

Morero o Gakgamatsang Wa Modimo



Morero o Gakgamatsang

Wa Modimo

ka Dutton A Bonnell



Copyright, 2007
International Publications Services
All Rights Reserved
IPSIMB.com - bw-gwp-bot-tsw

ISBN 0620 08694 7

E gatisitswe ke:

**Bible Way Correspondence School
PO Box 1600
Brits 0250**

TSHEDIMOSETSO KAKARETSEO LE DIKAELO

DITHUTHO TSA BIBLE WAY CORRESPONDENCE di rulaganyeditse ba ba iseng ba katisiwe mo dithutong tsa Beibele, le fa gontse jalo e rulagantswe ka mokgwa o e leng gore ba ba kileng ba ithuta Beibele dingwaga ba tlaa thusega mo dithutong tsena.

Maikaelelo ka dithuto tsena ke go tlhagisa morero wa Modimo wa pholoso, go katisa mo kitsong ya Beibele, le go thusa Bakresete go gola mo bodumeding. Mongwe le mongwe o a amogelwa go tsenela dithuto tsena.

Beibele e tshwanetse go nna fa thoko ga gago fa o ithuta dithuto tsena. O tshwanetse go bala ka kelotlhoko ditemana tse di tswang mo Beibeleng tse di tlhagang mo thutong e o e dirang. Fa go na le mafoko mo Beibeleng gongwe mo thutong a o sa a tlhaloganyeng batla tlhaloso ya one mo dikishinareng e e siameng.

Phetogo ya Aterese. Fa o fetola aterese ya gago. O kopiwa go itsise motsamaisi wa Bible Way Correspondence School.

Nomore ya moithuti e tlhomameng: Moithuti mongwe le mongwe yo o ikwadisang mo Bible Way Correspondence School o neiwa nomore. Nomore ena e botlhokwa thata go nne dikwalo tsotlhe tsa gago di bolokiwa ka yo na. Fa o kwalla go motsamaisi wa Bible Way o tshwanetse go mo naya **Leina la gago, Nomore ya Moithuti, le Aterese.**

ENA KE NOMORE YA GAGO YA MOITHUTI

(Ga gona yo mongwe yo o nang nayo)

ELA TLHOKO!

Gore o tle o neiwe setifikarata sa **Morero o gakgamatsang wa Modimo,** o tshwanetse go fetsa tlhatlhobo ya gago mme o e romele go rona pele

.....

LENANEO LA DITENG

TSHEDIMOSSETSO KAKARETSE LE DIKAELO

Thuto	Tsebe
1. Morero wa Modimo o gakgamatsang o re tthagisetsa ka ga boleo	5
2. Morero wa Modimo o senola tiro ya boleo	9
3. Morero wa Modimo o senola moleofi	12
4. Morero wa Modimo o senola gore motho o pallwa go ka ipholosa	16
5. Morero wa Modimo o naya motho se a se tlhokang mo maemong a motho a go pallwa go ka ipholosa	20
6. Mo morerong wa Modimo go neiwa tsela e bonolo ya pholoso.....	23
7. Morero wa Modimo o naya tsela ya go amogela pholoso	26
8. Morero wa Modimo o akaretsa go ipobola Kresete	30
9. Morero wa Modimo ke wa bosenang-bokhutlo	33
10. Morero wa Modimo o naya bophelo jo boshwa	37
11. Morero wa Modimo o naya bophelo jo boshwa (e tswella-pele)	40
12. Morero wa Modimo o baakanya le go roma badiri	43
Taletso ya gore o amogele Kresete	47

MORERO WA MODIMO O GAKGAMATSANG O RE TLHAGISETSA KA GA BOLEO

Temana ya go e itse ka tlhogo:

“Gonne tefo ya bolelo ke loso, mme neo ya bopelotlhomogi ya Modimo ke bophelo jo bo sa khutleng jo bo bonwang mo go Kriste Jesu Morena wa rona” – Baroma 6:23.

KETAPELE:

Mo dithutong tsena tse lesome le bobedi re tlaa ithuta dilo tse di ntsi ka ga Morero o gakgamatsang wa Modimo wa batho botlhe ba lefatshe. A re tlhomamisa go tlhaloganya gore go ithuta ka ga Morero wa Modimo ga go a lekana. Jaaka morero mongwe le mongwe, morero wa Modimo o tshwanetse go amogelwa le go salwa morago gore re tle re amogele melemo ya one.

Fa gona le tiro ya bothokwa e e tshwanetseng go dirisiwa, o tshwanetse go tlhomamisa gore go na le mongwe yo o nang le polane. Jaaka sekai, fa moagi a batla go aga ntlo santlha o nna fa fatshe mme a rulaganye polane. Fa moagi a latela polane sentle ntlo e tlaa agiwa ka go nepagala. Moagi a ka tshaga a re, “Ntlo e na ke ntlo e siameng ka go nne e agilwe ka go ya ka polane e e siameng.

Modimo le ena o na le morero o gakgamatsang. Morero wa Modimo ke wa motho mongwe le mongwe mo lefatsheng. Fa motho a ka ithuta morero wa Modimo le go o amogela mo bophelong jwa gagwe, motho yo o o tlaa bona boitumelo jwa boammaruri.

Thuto ya ntlha e tlaa nna go ithuta tlhologo ya bolelo. Modimo mo morerong wa gagwe o gakgamatsang, o re tlhagisetsa ka ga dilo tse di ka re kgoreletsa go amogela dilo tsotlhe tse Modimo o re nayang tsone mo morerong wa Gagwe, tse di molemo. Santlha a re tlhaloganyeng gore bolelo ke eng gore re tle re lemoge dikotsi tsa jone. Buisa temana ya go e itse ka tlhogo e e fa godimo. Baroma 6:23 e re bolella gore bolelo bo isa losong.

- 1. KE GORENG FA RE TSHWANETSE GO ITSE KA GA BOLEO**
Modimo, mo morerong wa Gagwe o gakgamatsang, o re tlhagisetsa

ka ga kotsi ya boleo. Beibele e re ruta gore batho botlhe ba leofile mme fa ba sa falosiwe ba tlaa swa. Fa boleo ele selo se se boitshegang jalo, re tshwanetse go tlhaloganya sentle ka ga jone go tswa mo lefokong la Modimo.

Tota re rata go ithuta ka ga boleo, fela bontsi jwa nako ya rona re tlaa bo dirisetsa go ithuta ka Modimo. Mo morerong wa Gagwe o gakgamatsang, o dirile tsela ya gore re falole mo boleong. Sekai ke sena, fa e kare letsatsi lengwe o goroga gae o tswa reropong wa fitlhela monnao a betwa ke metsi mo letsheng la metsi, selo santlha se o tla se dirang ke eng? A o ka tshwenyega ka gore monnao o tsenye jang mo metsing o mo tlogele a betwa ke metsi o ye mo motseng go botsa gore o tsenye jang mo metsing? Nyaa, ke dumela gore selo sa ntlha ke go bona gore morwa-rrago o mo kotsing e kgolo. Se se latelang e tlaa nna go mo pholosa.

Beibele e re ruta gore batho botlhe ba leofile mme fa fa ba sa pholoswe ba tlaa swa. *“Go nne tefo ya boleo ke loso, mme neo ya bopelotlhomogi ya Modimo ke bophelo jo bo sa khutleng jo bo bonwang mo go Kriste Jesu Morena wa rona”* – Baroma 6:23.

BUIZA DITEMANA TSENA TSE DI MALEBANA LE BOLEO

1 Johane 3:4; Genese 3:1-7; Baroma 1:18, 3:23;

Genese 2:17; Baroma 6:23.

2. TLHALOSO YA BOLEO

Lefoko le le dirisitswe go tlhalosa boleo le ka tlhalogangwa sentle thata ka go dirisa papiso. A re re o tshotse bora le motswi.

O baya selo se o batlang go se thuntsha go bona gore a o kgona go nepa. A re re o gogile mogala wa bora le motswi wa thuntsha o lebagantse se o se ikaeletseng mme wa se fosa. Ka mafoko a bonolo o tlaa re *“ke fositse se ke ne ke se ikaeletse. Ga ke a itaya se ke ne ke se batla ke se ikaeletse.*

Lefoko lena Boleo le kaya sone seo. Ka gonne re dirilwe ka sentshwantsho sa Modimo, re ne re tshwanetse gore maikaelelo a bophelo jwa rona e nne go batla thato ya Modimo le sebopego sa Gagwe. Mme rona botlhe re fositse se se batlegang mo go rona. O tlaa lemoga gore kare se se batlegang **eseng tse di batlegang** gonne botlhe re na le **Modimo** o le mongwe fela. Ka moo he, fa rona botlhe re pallwa ke go kgalha Modimo ka maphelo a rona re fositse se se batlegang mo go rona. Rona botlhe re leofile *“Go nne botlhe ba leofile, ba tlhoka tlotlo fa pele ga Modimo”* – Baroma 3:23.

3. BOLEO BO TSENE JANG MO LEFATSHENG *Genesi 3:1-7*

Se go bonalang e ka nna tshimologo ya boleo ke ka go nne motho yo o gololosegile mo tlhaloganyong o na le nonofo ya go **itlhophela** Modimo o re dirile jalo go re naya kgololosego ya go itlhophela. O tlaa lemoga gore mo go Genese 3:1-7 Modimo O neile bo rraa-rona mogolo go itlhophela go utlwa gongwe go se utlwe, Modimo o re tlhagisetsa kgatlanong le go se utlwe fela ga aka a pateletsa Atamo le Efa go dira selo se ba sa se rateng. O ba neile go ka itlhophela. A re ithuteng dintlha tsena tse tharo malebana le go itlhophela go re go neiwang ke Modimo.

1. **Kitso ya rona ya motho.** Botlhe re ka dumelana le gore re santse re na le go ka itlhophela go dira tshiamo le bosula, go tswa mo go rona.
2. **Kitso ya rona ya Modimo.** Re e a itse gore Modimo o re letlella go itlhophela. Ga a re thibe mo tseleng ya rona fa re rata go dira se se sa siamang.
3. **Kitso ya rona ya Beibele.** Ee mo Beibeleng ya rona re buisa ka ga batho ba ba ne ba na le kgololosego ya go itlhophela e ka nna se se siameng gongwe se se sa siamang.

Kamoo re a bona gore boleo lantlha bo fitlhelwa mo thatong ya motho gongwe mo mogopolong. Mme motho yo o dire sengwe se se sa siamang. Re bona gape jalo gore kantlha ya kgololosego ya go itlhophela re ka dira se se siameng gongwe se se sa siamang. Kabaka leo, boleo bo mo thatong pele ga gore re dire sengwe se se sa siamang. Boleo ke go tlola molao wa Modimo.

4. BOLEO BO MO LEFATSHENG LOTLHE

Buisa mo go Baroma 1:18 – 3:23. Ena ke karolo ya Beibele e telle fela e tlaa go thusa go tlhaloganya bothata jwa boleo. Fano re bona gore motho o na le kitso ya Modimo le gore o leofetse Modimo. Mme kajalo motho mongwe le mongwe o na le boikarabelo ka boleo jwa gagwe.

5. DINNETE DINGWE KA GA BOLEO

1. **Boleo ke tiro e e diriwang kgatlanong le Modimo, ka go o ikganela.** Baroma 8:7.
2. **Boleo ke seemo sa go se phepafale.** Motho fa a leofa sebopego sa gagwe se tlala leswe. Motho o tlhodilwe ka sebopego sa Modimo mme go phela kwa tlase ga seo ke boleo. Buisa Genese 6:5.

3. **Boleo ke maikutlo a go se dumele.** Ka tlwaelo boleo bo simolola ka go se dumele le go gana go ikanya. Kajalo boleo ke tiro e e diriwang Kgatthanong le Molao wa Modimo ka go ikganela. Seemo sa go nna leswe, boikepo, moo motho a a ganang morero wa Modimo wa go pholosiwa ka Jesu Kresete. Karolo e e maswe thata ka boleo ke gore bo kgatthanong le Modimo. Pesalome 51:4.

6. BOLEO MO DIKAROLONG TSE PEDI

Ka tlwaelo boleo bo akangwa ka lefoko le le lengwe fela, eleng boleo, fela fa re ka le arola ka dikarolo tse pedi re tlaa thaloganya thuto ya boleo sentle.

1. **Tshimologo ya boleo.** Beibele e re ruta gore boleo bo tsile mo lefatsheng ka motho a le mongwe fela, Atame "*Gonne botlhe ba tlaa phedisiwa ka Kriste jaaka botlhe ba swa ka Atame*" – 1 Bakorinthe 15:22. Boleo jwa ga Atame mo tshimologong ya motho bo tlisitse boleo mo lefatsheng. Boleo jona bo tsenye mo maphelong a batho botlhe. Beibele e re ruta gore botlhe re abetswe sebe sa tshimologo go tswa go Atame.

Gongwe rre kana mme o na le bolwetsi jo bo maswe thata. Ngaka e ka naya mme kgakololo ya gore a rulaganye gore a se ka a tlhola a nna le bana. Ngaka e itse gore ngwana o tlaa tsholwa a na le bolwetsi joo mme gongwe a ka a swa. Beibele e re bolella gore re rwesitse boleo jo bo tshwanang le ja ga Atame. Re rua boswa jwa boleo fela jaaka ngwana a rua bolwetse go tswa go motsadi yo o lwalang.

2. **Go itse ka ga boleo.** Fa re fitlha mo dingwageng tsa go itse tshiamo le bosula re na le boikarabelo. Re tlaa ikarabela go Modimo ka tsotlhe tse re di dirang. Re rua boleo jwa tlhologo. Fela gape boleo bo tsena mo maphelong a rona ka go pallwa go dira dilo tse di siameng.

7. LOSO LWA GA JESU SEFAPANONG LO APESA BOLEO JOTLHE

Ga gona boleo jo bogolo thata go Jesu a sa boitshwareleng "*Mme fa re tsamaya mo leseding jaaka ona o le mo leseding, re na le kopano mongwe le yo mongwe, ebile madi a ga Jesu Kriste, Morwaa-ona, a re itshekisa boleo jotlhe*" – 1 Johane 1:7.

KWALA SENGWE KA THUTO ENA

THUTO YA BOBEDI

MORERO WA MODIMO O SENOLA TIRO YA BOLEO

Temana ya go e itse ka tlhogo:

"Mme ditshiamololo tsa lona di lo lomologanya le Modimo wa lona; maleo a lona a lo sira sefatlhego sa ona, gore o se ka wa lo utlwa"
– Jesaya 59:2.

KETAPELE:

Mothutong ena re tlaa ithuta botlhe gore boleo bo dira eng go motho. Re tlaa bona gore boleo bo lomologanya motho le Modimo. Gape re tlaa bona gore boleo bo lomologanya motho le motho yo mongwe.

Mo morerong wa Gagwe o mogolo Modimo o akaretsa dikai mo Beibeleng go re itsise ka ga tse di boitshegang tse boleo bo di dirang.

1. BOLEO BO LOMOLOGANYA MOTHO LE MODIMO

Modimo o ila boleo buisa gape temana ya go e itse ka tlhogo e e fa godimo. Gape o buise le 1 Johane 1:5. Fa motho a dira boleo, Modimo ga o pateletse motho yo o go tlogela boleo. Modimo o letlella boleo go tswella-pele mo bophelong jwa motho yo o. Modimo o naya batho botlhe **Kgololosego ya go itlhophela**. Motho a ka itlhophela go rata Modimo le go tshegofadiwa gongwe a ka itlhophela go direla Satane le go ya diheleng. Buisa mo go Joshua 24:15, 16.

Fa re letlella boleo go tswella-pele mo dipelong tsa rona, bo tlaa tswella-pele go thibela gore re se amogele tsotlhe tse di molemo tsa lorato lwa Modimo, eleng nonofo le pholoso ya mewa ya rona.

Fa sesupa-nako se senyegile ke gore sengwe mo teng ga sesupa-nako kamano ya sone le tse dingwe e fosagetse. Modira sesupa-nako ga a se dira se le mo seemong seo. Fa go na le boleo mo mothong, ke gore go na le sengwe se se sa siamang. Kamano ya gagwe le morero wa Modimo ga ya siama. Ga a nyalana le Molaodi wa lefatshe lotlhe. Kopano ya gagwe le Modimo ga ya siama. Jaanong e re ka kopano ya gagwe le Modimo e sa siama o lomologanye le go ka itumella ka botlalo lorato lwa Modimo, nonofo le pholoso ya Gagwe. *"Ga go ope yo o ka direla barena ba le babedi, go nne o tlaa tlhoa yo mongwe;*

mme a rate yo mongwe; gongwe o tlaa ngaparela yo mongwe, mme a nyatsa yo mongwe. Ga lo kake lwa direla Modimo le Mamone” – Matheo 6:24.

Se se botlhoko thata-thata sa boleo ke gore bo lomologanya motho le Modimo.

2. BOLEO BO LOMOLOGANYA MOTHO GO MOTHO YO MONGWE

Fa re rata Modimo godimo ga tsotlhe, ga re kitla re tshwenyega ka ga kgono ya rona ya go rata batho ba bangwe, lerato la rona go Modimo le kopano nae di laola kopano ya rona le batho ba bangwe.

Fa motho a phela mo boleong, lerato la Modimo ga leo mo go ena. Ka lebaka leo, motho yo o ka se ka a phela ka kutlwano le batho ba bangwe.

A re lebeg tsholofetso ya Modimo malebana le kopano ya rona le batho ba bangwe. *“Mme fa re tsamaya mo leseding, jaaka ona o le mo leseding, re na le Kopano mongwe le mongwe, ebile madi a ga Jesu Kriste, Morwaa-ona, a re itshekisa boleo jotlhe”* – 1 Johane 1:7. Temana ena e re supetsa gore santlha re tshwanetse ra tsamaya mo leseding (go latela Modimo) **Ke moo** re tlaa nna le kopano le ba bangwe, **ka go nne** re latela Modimo. Gape temana ena ere go rona maleo a rona otlhe a tlaa itshwarelwa. Gakologelwa gore boleo bo tlaa nna bo lomologanya motho le Modimo fa motho a sa retologele go Modimo.

3. BOLEO BO DIRA GORE MOTHO A ATLHOLWE

Boleo bo dira gore motho a seka a dumela mo Modimong. Fa motho a sa dumele mo Modimong o phela ka fa tlase ga katlhoho. *“Yo o dumelang mo go e na ga a atholwe. Yo o sa dumeleng o setse a athlotswe, ka a se ka a dumela mo leineng la Morwa Modimo yo o tsetsweng a le esi”* – Johane 3:18.

Beibele e re ruta gore ba ba sa dumeleng mo go Jesu ba setse ba athlotswe. Jaanong ke eng se se dirileng gore ba se ka ba dumela? Beibele e re ke kantlha ya ditiro tse di bosula le go eletsa dilo tse di bosula tse di dirang gore batho ba gane go dumela mo Modimong. *“Mme katlholo ke e! lesedi le tsile mo lefatsheng, mme batho ba ratile lefifi bogolo go lesedi, go nne ditiro tsa bone di ne di le bosula”* – Johane 3:19.

4. BOLEO BO THIBELA BATHO GO TSENA LEGODIMONG

“A kampo go lo itse gore basiamolodi ga ba kitla ba rua puso ya

Modimo? Se tsietsegeng; le fa e le diaka gongwe badiredi-medimo gongwe bailhadi gongwe banna ba ba akafalang le banna gongwe magodu gongwe ba ba bohula gongwe matagwa gongwe bakgadi gongwe dinokwane, ga go ope wa bone yo o tlaa ruang puso ya Modimo” – 1 Bakorinthe 6:9-10.

Modimo o re ruta mo lefokong la Gagwe gore boleo bo thibela motho go tsena legodimong. Batho ba ka akanya gore ka go dira dilo tse di bosula ba itumella bophelo, fela letsatsi lengwe ba tlaa itshola kantlha ya maleo a bone. Gongwe nako e tlaa bo e setse e fetile ya gore ba ka bitsa Modimo gore a ba itshwarele. Ga gona motho yo o ka tlhomamisang gore o tlaa swa jang le gore o tlaa swa leng. Ke nnete Modimo o itshwarela maleo otlhe, fela modira-maleo o tshwanetse go nna le nako ya go tla go Modimo. Batho ba ba tswelang-pele ka go dira bosula ba gana go tla go Modimo ga ba kitla ba nna teng mo legodimong. Buisa Bagalata 5:19-21.

Jaanong ere ka ele moo re bone se boleo bo se dirang, Santlha re tshwanetse go tlhomamisa gore dipelo tsa rona di tlhapisitswe. Re na le sebaka sa go bitsa Modimo. Re ka tlhomamisa gore Modimo o tlaa utlwa le go araba thapelo e ngwe le e ngwe ya tlhoafalo. Re ka tlhomamisa gore Modimo o tlaa naya boitshwarelo. *“Mme fa re ipobola maleo a rona, ona o boikanyo le tshiamo go re itshwarela maleo le go re itshekisa tshiamololo yotlhe” – 1 Johane 1:9.*

KWALA SENGWE KA THUTO ENA

THUTHO YA BORARO

MORERO WA MODIMO O SENOLA MOLEOFI

Temana ya go e itse ka tlhogo:

“Gonne Modimo o ratile lefatshe mo go kalo, moo o bileng wa le neela Morwaa-ona yo o tsetsweng a le esi, gore mongwe le mongwe yo o dumelang mo go ene a se ka a latlhega, mme a nne le bophelo jo bo sa khutleng” – Johane 3:16.

KETAPELE:

Mo thutong e fetileng o ithutile ka ga se boleo bo se **dirang**. Jaanong re tlaa bona gore Modimo o supa jang moleofi dirisa a lefoko la Gagwe la bo Modimo. Re tshwanetse go leboga ka seo. E ka nna selo se se sa siamang fa batho ba ka se ka ba lemoga gore ke baleofi. Mo morerong wa Gagwe, Modimo o bontsha sentle gore moleofi ke mang, ka lefoko la Gagwe le ka Moya o o Boitshepo wa Gagwe.

1. BOTLHE BA LEOFI – KA LEBAKA LEO BOTLHE BA LATLHEGILE

“Gonne botlhe ba leofile, ba tlhoka tlotlo fa pele ga Modimo” – Baroma 3:23. Mo temaneng e e fa godimo re bona sentle gore batho botlhe ba leofile mme ka lebaka leo ba latlhegile.

(a) Boleo bo simologile ka Atame Genese 3

Motho wa ntlha mo lefatsheng e ne ele Atame, lotso lwa batho lo simologile ka ena. O ne a beilwe mo tshimong e ntle e nang le tsotlhe tse a ne a di tlhoka mo bophelong. Ka go nne Modimo o ne a batla gore Atame a mo rate tota, o mo neile go ka itlhophela. Atame o ne a ka itlhophela go utlwa Modimo le go phela bophelo jwa boitumelo gongwe go utlwa Satane mme a wele mo boleong. Atame o ne a itlhophela go utlwa Satane.

(b) Boleo jwa ga Atame bo tswella-pele mo lotsong lwa batho

Beibele e re bo lella gore boleo bo tsenye mo pelong ya motho mongwe le mongwe yo o mo lefatsheng. Boleo jo bo tswella-pele letsatsi le lengwe le le lengwe. Fa lesea le tsholwa, ngwana o tshotswe mo lefatsheng la boleo jo bo simologileng ka go wa ga Atame. *“Gonne botlhe ba tlaa phedisiwa ka Kriste jaaka botlhe baa swa ka Atame”* – 1 Bakorinthe 15:22.

Boleo mo metseng le mo metseng-teropo le mo mafatsheng otlhe a lefatshe. Ga gona motho yo o kareng gase moleofi. *“Fa re re, ga rea leofa re o dira moaki, le lefoko la ona ga le yo mo go rona”*— 1 Johane 1:10.

Dafita ene ele kgosi, fela erile Dafita a sena go dira boleo a rapela Modimo go mo itshwarela. Bona thapelo ya kgosi ena. *“Bona, ke tsaletswe mo tshiamololong, Mme o nkamogetse mo boleong”*— Pesalome 51:7. Ka nako tse dingwe re utlwa batho bare ga ba ise ba ke ba leofe. Fela batho ba ba buang jalo ba rialo ka gonne ba sa tlhaloganye se Beibele e re rutang sona ka ga boleo. Fano re bona kgosi e e ne e laola batho ba bantsi le fa go ntse jalo o dumela gore o tsholetswe mo lefatsheng la boleo. Ke moleofi santlha ka boleo jwa ga Atame. Mme dibe tse dingwe tse Dafita a di dirileng o di dirile ka go rata ga gagwe. Boleo jo a bo rapellang mo temaneng ena (Pesimalome 51:7) e ne ele tiro e a e dirileng ka go rata.

2. RE ITSE JANG GORE BOLEO BO MO LEFATSHENG LOTLHE (GONGWE LE GONGWE)

1. Beibele e re ruta gore batho botlhe ba dirile tse di kgatlhanong le Molao wa Modimo.

1 Dikgosi 8:46 *“Kana ga gona motho yo o sa leofing.”*

Pesimalome 143:2 *“Mme o se ka wa seka le motlhanka wa gago; gonne ga go mophedi ope yo o siameng fa pele ga gago.”*

Diane 20:9 *“Ke mang yo o ka reng: Ke tlhpile pelo, ga ke na boleo.”*

Baroma 3:10 *“Ga go ope yo o siameng le eseng a le mongwe fela.”*

1 Johane 1:8 *“Fa re re, ga re na boleo, rea itsietsa, mme boammaruri ga bo yo mo go rona.”*

Go tswa mo ditemaneng tse di fa godimo re bona sentle gore batho botlhe ba leofile. Tota re tsaya lefoko la Modimo godimo ga mafoko a batho. Moo re ka bona seemo sa motho ka mo lefokong la Modimo. Batho ba bantsi ba buisa makwalo a mangwe a a senang thuto e nepagetseng ya Beibele mo thutong ena. Lefoko la motho le ka fosa, fe la lefoko la Modimo ga le kitla le fosa.

2. Gona le tlhoko ya lefatshe ya gore seemo sa motho (moleofi) se fetoge.

Mareko 16:16 *“Yo o (motho mongwe le mongwe) dumelang a kolobediwa o tlaa pholoswa.”*

Johane 3:16 “Gonne Modimo o ratile **Lefatshe** mo go kalo, moo o bileng wa le neela Morwaa-ona yo o tsetsweng a le esi gore **mongwe le mongwe** (motho mongwe le mongwe) yo o dumelang mo go ena a se ka a latlhega, mme a nne le bophelo jo bo sa khutleng.”

Ditiro 17:30 “O laela batho botlhe mo ntlheng tsotlhe go tlhabologa.”

Jaaka re setse re bone mo ditemaneng tse di fa godimo, gore batho gongwe le gongwe ba tlhoka selo se se tshwanang. Batho botlhe ba mo boleong mme ka lebaka leo ba tlhoka go bona tsela ya go tswa mo boleong le go boela go Modimo.

Dipolelo tsena “**Mongwe le mongwe**”, “**gongwe le gongwe**”, le **lefatshe** mo Beibeleng di re bontsha gore gongwe le gongwe batho ba tlhoka go o pholoswa mo maleong a bone. Ka lebaka leo, thuto ena e re thusa go itse gore fa batho ba tshwanetse go pholoswa mo maleong a bone gongwe le gongwe, go raya gore batho botlhe ba mo boleong. Boleo bo mo lefatsheng lotlhe!

3. Beibele e re ruta gore katlholo e ntse fela jalo mo go ba ba sa amogeleng Kresete.

Beibele e re:

Johane 3:18 “Yo o sa dumelang o setse a athotswe, ka a sa dumela mo leineng la Morwa Modimo yo o tsetsweng a le esi.”

Johane 3:36 “Yo o sa utlweng Morwa ga a kake a bona bophelo, mme bogale jwa Modimo bo mo okame.”

3. MOKRESETE O IKUTLWELA BOLEO

Fa Moya o o Boitshepo o dumellwa go nna mo pelong ya motho, pelo eo e tlaa lemosiwa boleo. Ka lebaka leo motho yo eleng Mokresete o lemoga boleo mme o ipona fa ele moleofi. Jaanong motho yo o sa laletsang Modimo go nna mo pelong ya gagwe ga a kitla a tsibogela boleo. Gantsi o tswella-pele go dira dilo a sa botse gore a di siame gongwe di fosagetse fa pele ga Modimo.

Moapostolo Paulo o itsege mo Kgolaganong e Ntshwa yotlhe e le monna yo o makatsang wa Modimo. Fela le fa go le jalo, mo bokhutlong jwa tirelo ya gagwe, fa a ne a itse gore bophelo jwa gagwe bo gaufi le go khutla, o bua polelo ena ka ga gagwe a re ke moleofi.

“Lefoko le le ikanyegang, le le tshwanetseng go amogelwa tota ke le: Kriste Jesu o itsile mo lefatsheng go pholosa baleofi ba nna ke leng yo mogolo wa bone” – 1 Timotheo 1:15.

Ee, fa batho ba tla go Modimo ba ipona gore ke baleofi. Modimo o kgona go pholosa batho botlhe mo maleong a bone. Kgang e kgolo

thata e le fatshe le e itseng ke gore Modimo o ratile lefatshe mo go kalo moo o bileng wa romela Morwaa-ona yo o tsetsweng a le esi go swela lefatshe lotlhe mo sefapanong.

KWALA SENGWE KA THUTO ENA

MORERO WA MODIMO O SENOLA GORE MOTHO O PALLWA GO KA IPHOLOSA

Temana ya go itse ka tlhogo:

“Wa re pholosa, eseng ka ntlha ya ditiro tsa tshiamo tse rona re di dirileng, mme e le ka fa boutlwelo-botlhoko jwa ona ka tlhapo ya go tswalwa gape le ka ntshafatso ya Moya o o Boitshepo” – Tito 3:5.

KETAPELE:

Mo thutong ena re tlaa ithuta ka ga se lefoko la Modimo le se buang ka go pallwa ga motho fa a sena Jesu Kresete. Batho ba bantsi ba ba latlhegileng ba na le kgopolo ena e e sa tlwaelegang ya gore ba ka ipholosa ka maiteko a bone. O kare ba na le morero o **mongwe** eseng o o neilweng ke Modimo. *“Gonne ere ka ba sa itse tshiamo ya Modimo, ebile ba lekile go ithomela tshiamo ya bone. Ka bosii, ga baa ka ba ikokobeletsa tshiamo ya Modimo”* – Baroma 10:3.

1. DILO TSE PEDI MALEBANA LE GO PALLWA GA MOTHO

1. Motho a ka se ka a pholoswa ka go tshegetsa molao

Re tlaa fitlhela gore ga gona motho yo o ka kgonang go tshegetsa Molao wa Modimo ka botlalo ke Kresete fela.

Re tlaa leba mabaka ana a a latelang a goreng ke gore motho a ka se ka a pholoswa ka go tshegetsa Molao.

- (1) Ke Jesu fela yo o tshegiditseng molao ka botlalo.
- (2) Lefoko la Modimo la re rona botlhe re leofile – Baroma 3:23.
- (3) Fa re re ga re na boleo go tshwana le go bitsa Modimo moaki – 1 Johane 1:10.
- (4) Ga gona ope yo o ka pholosiwang ka go obamela molao – Baroma 3:20.
- (5) Tumelo mo go Kresete ke karabo – Bagalata 3:11.
- (6) Tiro ya molao ke go re isa kwa go Kresete – Bagalata 3:22-24.

2. Motho a ka se ka a pholoswa ka go dira ditiro tse di siameng

Batho ba bangwe ba akanya gore ba ka tswa go ya go direla

batho dilo tse di siameng di se kae le gore Modimo o tlaa ba pholosa kantlha ya ditiro tsa bone tse di siameng. Ga go phoso go direla batho ba bangwe dilo tse di siameng, fela re tshwanetse go ithuta gore pholoso ga e tle ka mokgwa o o. Beibele e tihalosa ntlha ena sentle. Buisa ditemana tsena tse di latelang: Tito 3:5 Baefeso 2:8, 9. O tlaa lemoga gore ditemana tsena tse pedi tsa bofelo di re bolella gore motho o pholoswa ka **boutlwelo-botlhoko**. **Boutlwelo-botlhoko** bo kaya molemo o Modimo a o direlang botlhe ba ba o amogelang. Boutlwelo-botlhoko ga bo rekwe bo tswa go Modimo. **Ke se Modimo o se dirileng ka Jesu Kresete Morwa wa Gagwe, se se re pholosang.** Ke boammaruri gore re tshwanetse go amogela neo ena, ka gonne bopelotlhomogi jwa Modimo jo bo sa rekweng ke jwa batho botlhe, ga bo direlwe gongwe go rekiwa.

Jaanong re tlaa leba ntlha e ngwe ya thuto ena. Motho a ka se ka a pholoswa ka ditiro tse di siameng, ke gore dilo tse a di dirang. Motho ga a pholosiwe ka go tlogela dilo tse di sa siamang mo bophelong jwa gagwe. Ke gore, **dilo tse a sa di direng.** Motho a ka se ka a re “Ntebeng ke motho yo o siameng, ka lebaka leo, sena ke sone se se mphositseng.”

Fa ele gore go ne go kgonega gore motho a ka siama ka nosi, go ka bo go sa tlhokega gore Jesu Kresete a swe mo Sefapanong a swela maleo a lefatshe lotlhe.

2. DITIRO TSE DI SIAMENG DI TSALANA JANG LE BOUTLWELO-BOTLHOKO

Santlha, ka go amogela Jesu Kresete ka tumelo re diriwa bana ba Modimo. **Sabobedi** fa re le bana ba Modimo ba boammaruri mme re mo letlella go tsamaisa maphelo a rona, ke moo re tlaa dirang ditiro tse di siameng (ditiro tsa Bokresete) jaaka ele bophelo jwa tlhologo ya rona ya maitemogelo a rona a Bokresete.

Ditiro tse di siameng di gola go tswa mo maitemogelong a rona a boutlwelo-botlhoko. Re tsamaya re dira tse di siameng **ka gonne re le Bakresete.** Ka jalo re bona gore ba ba pholositsweng ka boutlwelo-botlhoko ba direla Modimo dilo tse di ntsi tse di siameng. Jaanong fa o ka botsa batho ba na gore ba pholositswe jang, ga ba kitla ba re ba amogetse pholoso ka gonne ba dirile ditiro tse di siameng. Ba tlaa re ba pholositswe ka boutlwelo-botlhoko jwa Modimo, le gore Modimo ona wa boutlwelo-botlhoko o santse a tsamaisa maphelo a bone mo go mo direleng.

3. KE GORE FA GO SA KGONEGE GORE MOTHO A IPHOLOSE

1. **Motho ga a kgone go ka ipholosa ka go nne o setse a tlotse molao wa Modimo, mme ga a kgone go siamisa maleo a gagwe go Modimo.**

(a) Go utlwa-bothloko kantlha ya bolelo ga go kgotsofatse molao wa Modimo o o robilweng. Go utlwa-botlhoko, le fa e ka nna go go tseneletseng ko teng, le ga boamaruri, ga go kitla go baakanya phoso ya nako e fetileng. Go ka se ka ga kgotsofatsa molao o o tlotsweng wa Modimo. Nnete ke gore **molao o o robilweng** o batla gore motho yo o tlotsweng molao a otlhaiwe. **Motho** o robile molao wa Modimo ka bolelo mme mongwe o tshwanetse go duela molato.

(b) **Go fetola bophelo jwa gago** ka gotlhe go ka se ka ga tlosa maleo a a setseng a dirilwe. Re tshwanetse go gakologelwa gore go phela ka thokgamo mo **nakong e e tlang** ga go phimole maleo a **nako e fetileng**. Fa motho yo o latlhegileng a ne a ka kgona go lesa go leofa ka nako e le ngwe fela mme a phela bophelo jo bo senang bolelo bophelo jwa gagwe mo lefatsheng. One a santse a ka nna boseng-bokhutlo mo diheleng. Mo bokhutlong o tlaa kobiwa fa pele ga Modimo. Bolelo (go tloa Molao wa Modimo) bo tshwanetse go duellwa. Goseng-jalo, motho yo o latlhegileng (moleofi) o tshwanetse go otlhaiwa.

A re re o rekile diaparo tsa gago tse dintshwa lebentleleng ka sekoloto, a re re akhaonte ya gago e supa gore o kolota monga lebentlele diranta tse lesome le botlhano. Jaanong o fetsa ka gore o tlaa lesa go reka ka sekoloto o duele ka nako e o rekang ka yone. O tsena mo lebentleleng mme o bolella monga lone se o batlang go se dira. O tlaa go raya are o itlhophetse go dira selo se se siameng. **Fela** o tlaa go kopa gore o duele diranta tse lesome le botlhano tse o di kolotang.

Maleo a rona a nako e fetileng, tse di re saletse, di tshwanetse go duelwa ke mongwe. Re ka se ka ra tsaya phetso ya gore re tlaa simolola jaanong-jaana bophelo jo boshwa mme ra solofela gore maleo a rona a nako e fetileng ga a na go lemogiwa.

2. **Motho ga a kgone go ka ipholosa ka gone o na le tlholego ya bolelo mme ga a na nonofo ya go ka iphetola.** *“Gone go batla ga nama ke go tloa Modimo, ka e sa ikokobeletse molao wa*

Modimo, ebile ea pallwa” – Baroma 8:7. Gape o buise le 1 Bakorinthe 2:14.

4. MOTHO YO O LATLHEGILENG O TLHOKA PELO E NTSHA

Moleotl o dira ditiro tse di bosula, o akanya dikakanyo tse di bosula, o ya mafelo a a sa siamang gape o gana Jesu Kresete ka go nne a na le pelo e e bosula. Se a se tlhokang tota ke pelo e ntsha. *“Modimo mpopele pelo e e itshekileng o ntshafatse moya o tlhomameng mo teng game”* – Pesalome 51:12.

DILO TSE DI KA SE KANG TSA FETOLA TLHOLEGO YA MOTHO

Ga gona setso, go phefadiwa, thuto gongwe borapedi, tiro ya go iphedisa tse di ka fetolang tlholego ya Motho.

KE ENG SE SE KA FETOLANG TLHOLEGO YA MOTHO?

Motho ga a kgone go ka fetola tlholego ya gagwe. O tshwanetse go tsalwa seshwa. *“Fa motho a sa tsalwe go tswa godimo, ga a kake a lemoga puso ya Modimo”* – Johane 3:3.

Re ka fetsa ka gore motho fa a sena Jesu Kresete gase fela gore o latlhegile, fela gape o mo maemong a go pallwa ke go ka ithusa. Ke ka Jesu Kresete fela motho a ka pholoswang mo seemong sa go latlhega le go pallwa go ka ithusa.

KWALA SENGWE KA THUTO ENA

THUTO YA BOTLHANO

MORERO WA MODIMO O NAYA MOTHO SE A SE TLHOKANG MO MAEMONG A MOTHO A GO PALLWA GO KA IPHOLOSA

Temana ya go itse ka tlhogo:

“Rona botlhe re ne re timetse jaaka dinku, mongwe le mongwe wa rona a fapogela mo tseleng ya gagwe, mme MORENA o na a mo digela melato ya rona rotlhe mo go ena” – Jesaya 53:6.

KETAPELE:

Mo dithuto di se kae tse di latelang re tlaa ithuta gore motho o pholosiwa jang. Pele ga gore motho yo o a pholoswe o tshwanetse go amogela kitso ya se Beibele e se bolelang ka ga maemo a gagwe a go latlhega. Gongwe mongwe a ka naya motho ona Beibele e e nang le ditemana tse di tshwailweng, tse di bontshang sentle gore o eme kae malebana le Modimo. Gongwe motho yo o a ka lalediwa go tla kerekeng mme a utlwa thero e e reriwang ka ga kgang ena mo thutong.

Mo go rona ba ba tshwenyegileng ka batho ba ba latlhegang ba ba re dikaganyeditseng, re a itse gore tiro ya rona ke go ba bolella ka ga maemo a bona a go latlhega. Re tshwanetse go tsaya sebaka sa go rapela le bone. Re tshwanetse go gakologelwa ka dinako tsotlhe gore ke motho yo o bidiwang Moya o o Boitshepo (Modimo) yo o ka lemosang motho ka ga bolelo. Rona re jwala peo mo pelong ya motho, fela Modimo o tshwanetse go letlellwa go e tlhogisa. Buisa ka kelotlhoko mo go Baroma 10:13-5.

1. TLHAGISETSO GO TSWA LEFOKONG LA MODIMO

1. Go boitshega ga bolelo. Beibele e re, “Mongwe le mongwe yo o dirang bolelo oa siamolola; bolelo ke jone tshiamololo” – 1 Johane 3:4. Bolelo ga se selo se senyenyane, ke go tlola Molao wa Modimo. Ke go tlhokomologa thato ya Modimo. Selo se se boitshegang go feta tsotlhe ke gore bolelo bo **Kgatlhanong le Modimo**. Fa motho a dira sengwe se se bosula go yo mongwe, go ba utlwiswa botlhoko, fela selo se se fetang tsotlhe ke gore tiro ena e kgatlhanong le Modimo.

Gongwe papiso ena go tswa mo lefokong la Modimo e tlaa thusa go tthalosa gore boleo bo kgatlhanong le Modimo. Dafita, yo ene ele kgosi, one a utswa mosadi wa monna yo mongwe le go bolaya monna wa mosadi yo o. Mo tiragalong ena re ka re Dafita o leofetse monna le mosadi. Erile morago ga nako Dafita a sokologela go Modimo ka bophelo jwa gagwe go tswa mo boleong jona *“Ke wena o le nosi fela, yo ke go leofetseng, ka dira se mo matlhong a gago se eleng bosula, gore ere fa o bua, o fitlhelwe o siame, mme o le phepha, fa o athhola”* – Pesalome 51:6.

2. **Batho botlhe ke baleofi gape ba latlhegile.** Batho botlhe ba tshwanetse go lemoga gore ba tlaa athholwa ka seemo sa Modimo eseng sa bone. Lefoko la Modimo le re batho **botlhe** ke baleofi. Elatlhoko lefoko lena **BOTLHE** mo ditemaneng tsena tse di latelang:

Jesaya 53:6. “Rona rotlhe re ne re timetse jaaka dinku, mongwe le mongwe wa rona a fapogela mo tseleng ya gagwe”.

Ditiro 17:30 “Modimo . . . o laela batho **botlhe** mo ntlheng tsotlhe go tlhabologa.”

Baroma 3:9-12 “Gonne re setse re supile gore Bajuta le Bagerika **botlhe** ba mo taolong ya boleo, jaaka go kwadilwe ga twe: Ga go ope yo o siameng, le eseng a le mongwe fela.

Botlhe ba fapogile, **botlhe** mmogo ba tlhobosegile; ga go ope yo o dirang molemo, ga a yo le eseng a le mongwe fela.”

Baroma 3:23 Gonne **botlhe** ba leofile, ba tlhoka tlotlo fa pele ga Modimo.”

Bagalata 3:22 “Mme lokwalo lo golegeletse **botlhe** mo boleong. Modimo o raya motho mongwe le mongwe are, “O leofile.”

3. **Maemo a moleofi yo o latlhegileng a jaanong jaana**

- (a) Ga ana bophelo jo bo sa khutleng.

“Mme tshupo eo ke e ereng:

Modimo o re neile bophelo jo bo sa khutleng, mme bophelo jo o bo mo go Morwaa-ona. Yo o nang le Morwa o na le bophelo; yo o se nang Morwa Modimo, ga ana bophelo. (bophelo jo bo senang bokhutlo”) 1 Johane 5:11, 12.

- (b) **Jaanong o ka fa tlase ga kathholo**

Jesu are “Yo o dumelang mo go ene ga a athholwe. **Yo o sa**

dumeleng o setse a athlotswe, ka a se ka a dumela mo leineng la Morwa Modimo yo o tsetsweng a le esi". Johane 3:18.

(c) **O ka fa tlase ga bogale jwa Modimo.**

"Yo o dumelang mo go Morwa o na le bophelo jo bo sa khutleng; yo o sa utlweng Morwa ga a kake a bona bophelo, mme bogale jwa Modimo bo mo okame. Johane 3:36.

(d) **Ka lebaka leo, ke sesinyi se se athlotsweng se se emetseng go athlolwa**

"Baikepi ba tlaa boela kwa felong ga baswi, le baheitane ba ba lebitseng Modimo." Pesalome 9:18.

O buise le ditemana tsena tse di mo makwalong: Johane 5:28, 29; 2 Bathesalonika 1:7-9; 2 Petoro 3:7.

4. Kwatlhao ya bone e tlaa nna eng?

(a) **Go nna Kgakala le sefatlhego sa Morena** "Mo ponatshegong ya Morena Jesu, mogang a tswang kwa legodimo, a na le baengele ba thata ya gagwe a le mo kgabong ya mollo, a bosulosa bone ba ba sa itseng Modimo, ebong bone ba ba sa utlweng Efangele ya ga Jesu Morena wa rona. Ba tlaa boga petso, ebong tshenyego e e sa khutleng, e le ya go nna Kgakala le sefatlhego sa Morena Kgalalelo ya thata ya gagwe, 2 Bathesalonika 1:7-9.

Gape o buise Matheo 7:21-23; Tshenolo 21:27.

(b) **E bidiwa loso . . . loso lwa bobedi** (buisa Tshenolo 20:14, 15). "Boleo jone, ere bo sena go tlala, bo tsale loso" Jakobo 1:15. "Gonne tefo ya boleo ke loso" Baroma 6:23 loso ga lo kae go khutla go nna teng. Lo kaya go kgaogana. Ke se se diregang fa motho a swa (jaaka re bua ka ga lone) ke go kgaogana ga moa le mmele.

"Loso lwa bobedi" lo kaya go kgaogana ga moya (moa) wa motho ga o tloga fa pele ga sefatlhego sa Modimo. "Ba tlaa boga petso, ebong tshenyego e e sa khutleng ele ya go nna kgakala le sefatlhego sa Morena le kgalalelo ya thata ya gagwe" 2 Bathesalonika 1:9.

Tota re bone mo lefoko la Modimo gore Modimo o batla gore batho botlhe ba itse maemo a bone a go latlhega. Jaanong go go motho mongwe le mongwe go utlwa tlhagi-setso ya Modimo nako e ise e fete.

THUTO YA BORATARO

MO MORERONG WA MODIMO GO NEIWA TSELA E BONOLO YA PHOLOSO

Temana ya go e itse ka tlhogo:

"Mme Modimo o supile lorato lo o re ratang ka lone, ka Kriste a re swetse, re ntse re le baleofi" – Baroma 5:8.

KETAPELE:

Mo thuto ena re tlaa ithuta ka ga keletso ya Modimo ya gore batho botlhe ba pholoswe. Modimo o dirile morero o bonolo wa pholoso gape o bonolo go o tlhologanya. Modimo o rata gore batho botlhe mo lefatsheng ba tlhologanye tsela ya gagwe ya go pholoswa.

Re ka akanya ka makgetlo a mantsi mo a maano a batho a neng a re palla. Go ka se ka gatwe Modimo o kile a lebala a le mongwe wa batho mo leanong la Gagwe.

O tlaa lemoga mo temaneng ya go e itse ka tlhogo gore Modimo o eletsa gore batho botlhe ba pholoswe. Re tshwanetse go gakologelwa gore motho gore a pholoswe ga se selo se se itiregelang fela ka gonne Modimo a neile motho pholoso. Motho le ena o tshwanetse go nna le keletso ya go pholoswa.

1. LORATO LWA MODIMO GO BOTLHE

"Gonne Modimo o ratile lefatshe mo go kalo, mo o bileng wa le neela Morwaa-ona yo o tsetsweng a le esi, gore mongwe le mongwe yo o dumelang mo go ene a se ka a latlhega, mme a nne le bophelo jo bo sa khutleng" – Johane 3:16.

Fano mo temaneng ena re elatlhoko lefoko lena "**mongwe le mongwe**" Lefoko lena le dirisiwa ke Modimo go bontsha gore **mongwe le mongwe le batho botlhe** mo lefatsheng ba na le sebaka sa go dumela mo go Jesu Kresete le go amogela pholoso.

Gape mo temaneng e e fa godimo re tshwanetse go elatlhoko lefoko lena "**lefatshe**" Temana ena e bua sentle fela gore Modimo o ratile **lefatshe mo go kalo**. Kamoo re bona gape gore lorato lwa Modimo gase la batho ba se ba kae, fela ke la batho botlhe ba lefatshe.

2. MODIMO O LALE TSA BOTLHE GO PHOLOSIWA

“Tlang kwano go nna, lotlthe ba lo lapileng, ba lo imelwang; nna ke tlaa lo lapolosa. Ipeleseng jokwe yame, lo ithute mo go nna; gonne ke bonolo le boikokobetso mo pelong, mme lo tlaa bonela mewa ya lona tapologo” – Matheo 11:28-29.

Fano re bona gore gase fela gore o rata batho botlthe, fela gape o laletsa batho **botlthe** gongwe le gongwe go amogela pholoso.

Ditemana tse di latelang di tiisa boammaruri jwa gore Modimo o laletsa batho botlthe; Hosea 6:1; Luka 14:17; Luka 14:23; Tshenolo 22:17.

3. MODIMO O DIRETSE BATHO BOTLHE SEBAKA SA GO PHOLOSWA

“A ba a ba raya a re: Yaang le lefatshe lotlthe, lo rerele lobopo lotlthe Efangele. Yo o dumelang, a ba a kolobediwa, o tlaa pholosiwa; yo o sa dumeleng ene o tlaa athholwa” – Mareko 16:15, 16.

Fano re bona gape gore Modimo o diretse botlthe sebaka sa go pholoswa ka go romela Bakresete go batho botlthe ba lefatshe go ba rerela Efangele.

Buisa ditemana tsena tse di latelang: Ditiro 1:8; Ditiro 2:38, 39; Baroma 5:8; Baroma 4:23-25; Baroma 5:16, 18; Bagalata 3:13, 14; Bagalata 4:4, 5.

4. MODIMO O ROMILE MOYA O BOITSHEPO GO LEMOSA LE GO LALE TSA MOTHO MONGWE LE MONGWE

“Mme ke lo bolella boammaruri fa ke re: Go molemo go lona fa ke tsamaya; gonne fa ke sa tsamae, mogomotsi ga a kake a tla go lona. Mme fa ke tsamaya, ke tlaa mo romela go lona. Fa a sena go tla, o tlaa lemosa lefatshe boleo le tshiamo le katlholo; boleo, e le go sa dumeleng ga bone mo go nna; tshiamo, e le fa ke ya kwa go Rre, mme lo se ne lo tlhola la mpona; katlholo, e le fa molaodi wa lefatshe leno a atlhotswe” – Johane 16:7-11.

Erile pele ga gore Jesu Kresete a boele kwa legodimong go Rre, o ne a ba solofetsa go ba romela Mogomotsi yo mongwe. Mogomotsi yo ke Modimo, yo o ikayang ka sebopego sa Moya o o Boitshepo. O ka botsa gore a rena le Medimo e meraro mme karabo e tlaa re nyaa. Mo go Doiteronomo 6:4 Modimo are, “Utlwa Iseraele! Morena, Modimo wa rona ke ene Morena a le esi fela”. Gongwe o ka gakgamala gore ke ka lebaka la eng fa Beibele e bua ka ga Modimo Rara, Morwa le Moya o o Boitshepo. A re boneng dikarolo tse di bontshang moo Modimo o ikayang ka ditsela tse tharo tse di farologanyeng.

1. Mo go Genesi 1:1 Re ithuta gore Modimo o ikaya gore ke **Motlhodi wa lefatshe.**
2. Mo go Johane 3:16 Re ithuts ka ga Modimo o romela Morwa wa Gagwe go swa mo sefapanong a swela batho botlhe ba ba latlhegileng gore ba tle ba pholoswe. Jaanong ena Modimo oo yo o tlhodileng lefatshe o tllile mo lefatsheng ka motho yo o bidiwang Jesu Kresete. Kamoo re bona gore ka nako ena Modimo o ikaya fa ele **Morwa.**
3. Jaanong mo go Johane 14:16 Jesu o bua ka ga Mogomotsi lefoko le lengwe la Mogomotsi ke Moya o o Boitshepo. Kamoo jaanong Modimo o ikaya fa ele Moya o o Boitshepo. Le gompieno le fa re sa kgo ne go bona Modimo, re itemogela Ena ka kopano ya Moya o o Boitshepo. Mo tshimologong re rile Moya o o Boitshepo o le mosa le go laletsa botlhe gore ba tle go Modimo. Ka sena re raya gore Modimo o ikaya ka Moya o o Boitshepo, o tsena mo pelong ya motho mme a mo lemosa ka boleo. Go a tlhokega gore motho a lemosiwe ka boleo. Fa motho a sa lemosiwe ka boleo ga a kitla a lemoga gore o tshwanetse go sokologa le go dumela mo go Jesu Kresete gore a tle a pholoswe. Moya o o Boitshepo o dira tiro ya go ba lemosa ka boleo. Modimo o dirile sebaka sena sa go thusa gore batho ba bone mme ba eellwe gore ba tlhoka Modimo. Buisa Ditiro 2:37.

5. MODIMO O ITSHWARELA BOTLHE BA BA TLANG KWA GO ENA

“Erile ka letsatsi le le latelang a bona Jesu a tla go ena are: Bonang, kwana ya Modimo, e e tlosang boleo jwa lefatshe!” – Johane 1:29.

Maleo a rona a tlositswe fa re ne re **sokologa** mme re boela go Modimo ka **tumelo** mo go Jesu Kresete. Ke moo Modimo o re itshwarelang maleo a rona.

“Mme fa re ipobola maleo a rona, ona o boikanyo le tshiamo go re itshwarela maleo le go itshekisa tshiamololo yotlhe” – 1 Johane 1:9.

Morago ga go buisa dikarolo tsena tsa lefoko la Modimo re lemoga gore tsotlhe tse Modimo o di diretseng batho botlhe gase selo se senyenyane. Re tshwanetse go leboga Modimo letsatsi le lengwe le lengwe. O eletsa gore botlhe ba pholoswe. O re diretse tsela ya go tla go Ena le go itse ka ga pholoso. Tsela e leng yona fela ya go pholoswa ke ka Jesu Kresete.

MORERO WA MODIMO O NAYA TSELA YA GO AMOGELA PHOLOSO

Temana ya go e itse ka tlhogo:

“Mme fa re ipobola maleo a rona, ona o boikanyo le tshiamo go re itshwarela maleo le go re itshekisa tshiamololo yotlhe”—1 Johane 1:9.

KETAPELE:

Motho o tshwanetse go **amogela** tsele ya Modimo ya go pholoswa. Fa motho e nna MoKresete, o **furalla** bolele mme o sokologela kwa go **Kresete**. Go furalla bolele go bidiwa **tshokologo** go sokologela go Kresete go bidiwa **tumelo**.

Mo thutong ena re tlaa ithuta boammaruri bongwe ka ga **tlhabologo** le **tumelo**. Go botlhokwa go tlhaloganya gore **tlhabologo** le **tumelo** di kaya eng gonne ke tsone motheo wa se Modimo o se batlang go batho botlhe. Rona rotlhe re tshwanetse go sokologa mo maleong a rona re retologele go Jesu Kresete ka **tumelo** pele ga gore re ka amogela pholoso ya mewa ya rona.

1. TLHABOLOGO

Lefoko lena tlhabologo le tswa mo lefokong le le kayang “Go fetoga ga mogopolo”. Le kaya go **retolola bophelo jwa go se dumele le go rata bolele**. Ke moo Mokresete a retologelang go Jesu Kresete ka **tumelo**.

TLHABOLOGO E AKARETSA ENG

Ga go a lekana go raya motho ore o tshwanetse go tlhabologa mo maleong a gagwe. Re setse re bone gore tlhabologo ke tiro ya go furalla bolele. Re tswella-pele go bona gore go direga eng fa motho a tlhabologa mo maleong a gagwe.

1. O tlaa fetola mogopolo wa gagwe malebana le bolele

Fa motho a tlhaloganya tlhologo ya bolele le gore ke moleofi o fitlhile mo kगतong ya ntsha ya tlhabologo. Baroma 6:23 e bontsha gore batho botlhe ba leofile mme ba tlhabela kgalalelo ya Modimo.

Kajalo batho botlhe ke baleofi.

E leng jona fela tsela ya go tshaloganya boleo jwa rona ke go bo bona mo leseding la kopano ya rona le Modimo. Gonne ga gona motho yo o ka tshabologang mo boleong fa a sa lemoge ka botlalo gore ke moleofi. Motho o tshwanetse go fitlha mo o a lemogang gore o leofile kgatshanong le Modimo. Sena ke tiro ya Moya o o Boitshepo. Jesu fa a bua ka ga go tla ga Moya o o Boitshepo are, *“Fa a sena go tla, o tlaa lemosa lefatshe boleo”*— Johane 16:8. Mafoko a ga Jesu ane a dirafala ka letsatsi la Pentekoste fa Moya o o Boitshepo a ne a tla mme a tlatla barutwa. Erile fa Petoro a rera, batho ba ne ba lemosiwa maleo a bone mme ba goetsa bare *“Banna ba ga etsho, re ka dirang? Sena ene ele tiro ya Moya o o Boitshepo o o lemosang batho maleo a bone. Buisa sena mo go Ditiro 2:37.*

Re a tshomamisa, gore fa motho a tshabologa, o lemositswe ke Moya o o Boitshepo gore maleo a gagwe a kgatshanong le Modimo.

2. O tla utlwa botlhoko thata ka ntlha ya boleo jwa gagwe

Motho yo o tshabologang tota mo maleong a gagwe o tlaa utlwa botlhoko thata kantlha ya maleo a a a dirileng kgatshanong le Modimo. E re ka maleo otlhe a le kgatshanong le Modimo kutlwo botlhoko ya moleofi e tshwanetse go lebisiwa go Modimo.

Fa motho a akanya ka bogolo jwa Modimo le gore Modimo o mo diretse go le gontsi jang, maleo a motho yo a a dirileng kgatshanong le Modimo a tlaa mo utlwa botlhoko thata.

Fela le fa go ntse jalo, motho a ka lemosiwa maleo a gagwe mme a utlwa botlhoko thata kantlha ya one **mme a sa fitlha mo tshokologong ya boammaruri**. Go utlwa botlhoko kantlha ya maleo ke kgato e kgolo ya bobedi (re ka re mo) go fitlhelleng tshokologo ka botlalo. Buisa 2 Bakorinthe 7:10.

3. O tlaa furalla boleo

Fa motho o lemositswe ke Moya o o Boitshepo maleo a gagwe. Seo ke kgato ya ntlha. Kgato ya bobedi e e isang tshokologong ke go utlwa botlhoko kantlha ya maleo ao. Go tlotlhomisa gore a tshokologo ke ya boammaruri ke gore a motho yo o furaletse maleo a gagwe otlhe.

Re ka bua jalo ka kgololosego gore motho yo o ganang go furalla maleo a gagwe ga a sokologa tota mo maleong a gagwe. **Re tshwanetse go gakologelwa gore motho yo o furallang maleo a gagwe ga a dire**

jalo ka nonofo ya gagwe. Ka nosi ga kake a furalla maleo a gagwe ke ka go nna teng ga Modimo le nonofo ya ona motho a ka kgonang go fenyha dithaelo le diteko le fa e ka nna tse di ntseng jang.

Fa motho a furalla maleo, o tshwanetse go **retologela** go Kresete. Re tshwanetse go gakologelwa gore fa motho a retologela kwa go Kresete o tlaa tlhagelwa ke dithaelo tse di maswe thata le maleo a a tshwanetseng go a fapoga. Ka moo he a re boneng se se buiwang ke lefoko la Modimo ka ga kgang ena. Go buiwa ka ga Jesu, Baheberu 4:15 re bolellwa gore “Gonne moperesiti yo mogolo wa rona ga se yo o pallwang ke go utlwela makoa a rona botlhoko, mme re na le yo o neng a raelwa mo dilong tsotlhe fela jaaka rona, me a se ka a leofa.”

Re bona gore o tshwanetse go thusa batho botlhe. O rata go thusa botlhe go fenyha bolelo. Buisa 1 Bakorinthe 10:13.

Go tlhabologa go kaya go **furalla bolelo jotlehe**. Batho ba bangwe ba dumela go tlogela maleo a mangwe a bone fela ba leka go tshwara a mangwe mo go bone. Go tlhabologa ke go furalla **bolelo jotlehe**. Sena se diriswa ke nonofo ya Moya o o Boishepo. Fa sena se direga re bona phetogo e kgolo mo bophelong jwa rona.

2. TUMELO

Tlhabologo ke go furalla bolelo. Tumelo ke go retogela kwa go Kresete go mo ikanya le go inela.

Re bua ka **tumelo e e pholosang** ke rialo ka gonne go na le mefuta e mentsi ya ditumelo. Re bua ka mofuta wa tumelo e e tlhalosiwang ke lefoko la Modimo gore ke **tumelo e pholosang**. Tumelo go Morena wa rona Jesu Kresete e dirisanya le tlhabologo. Re di tlhoka ka bobedi gore re tle re pholoswe. “*Gonne lo pholositswe ka boitshwarelo ka tumelo*” – Baefeso 2:8.

Gape le mo go Luka Jesu are “*Mme fa lo sa sokologe, le lona lo tlaa nyelela jalo lotlhe*” – Luka 13:3.

Jaanong re a tlhaloganya gore tlhabologo (Luka 13:3) le tumelo (Ditiro 20:21) di a tlhokega gore motho a pholoswe.

TUMELO MO MOTHONG

Tumelo e pholosang ke go dumela mo go Morena Jesu Kresete. Re dumela mo go Ena yo o swetseng maleo a rona mo sefapanong mme a tsoga mo baswing “*Mme ene o phololelwe ka ntlha ya maleo a rona, a ketekelwa melato ya rona petso ya mo wela, gore rona re bone kagiso, mme re fodisitswe ka dintho tsa Gagwe*” – Jesaya 53:5.

TUMELO E AKARETSA ENG

- (a) **Go dumela.** Tumelo e akaretsa go dumela go Kresete. Motho fa a dumela ka boammaruri go motho yo mongwe ga go tshwane le go itse motho yo o fela.
- (1) Tumelo e akaretsa go **dumela** gore **Jesu Kresete ke Morwa wa Modimo.**
Ke go **dumela** fela mo go **Jesu Kresete** yo e leng **Modimo** go go ka tlisang pholoso.
 - (2) Tumelo e akaretsa go **dumela** gore tota **Jesu Kresete o swetse maleo a rona mo sefapanong.**
 - (3) Tumelo e akaretsa go **dumela** gore **Jesu o tsogileng mo lebitleng.**
- (b) **Go amogela.** Tumelo e akaretsa go amogela Jesu Kresete jaaka Mopholosi. Buisa Johane 1:12. Tumelo mo go Kresete ke go amogela Kresete.
- (c) **Go ineela.** Tumelo e akaretsa go neela maphelo a rona go Jesu Kresete. Motho yo o ratang go nna Mokresete o tshwanetse go diragatsa morero wa Modimo ka go
- (1) **Tlhabologa** mo boleong le
 - (2) **Go amogela** Jesu Kresete ka **tumelo.**

KWALA SENGWE KA THUTO ENA

MORERO WA MODIMO O AKARETSA GO IPOBOLA KRESETE

Temana ya go e itse ka tlhogo:

“Ke lo raya ke re: Mongwe le mongwe yo o impolelang fa pele ga batho, Morwa-motho le ene o tlaa mo ipolela fa pele ga baengele ba Modimo” – Luka 12:8.

KETAPELE:

Re buisa mo temaneng ya go e itse ka tlhogo gore go ipobola Kresete go botlhokwa. A re ithuteng mmogo se lefoko la Modimo le re rutang sone ka go ipobola Kresete.

Fa motho a amogela Kresete ka boamaruri go nna Mopholosi wa bophelo jwa gagwe, **ka dinako tsotlhe o siametse go bolella ba bangwe ka Mopholosi wa gagwe.**

A rere, erile letsatsi lengwe o tsamaya mo sekgweng wa fitlhela taemane e ntsi thata. One o sa itse sentle gore ke chelete e ka nna bokae, fela a rere tlhwa tlhwa ya yona e ka nna sekete sa diranta. Jaanong a o ka tsaya taemane ena mme wa e epela mo mmung wa se ka wa bolella ope ka ga yone?

Jesu o botlhokwa thata go feta taemane. Go itse mo dipelong tsa rona gore re pholositse mo maleong a rona ka loso le tsogo ya Morena wa rona mo baswing ke maitemogelc a re tshwanetseng go nna mafolofolo go abelana le batho ba bangwe ka ga one.

1. BOKAO JWA GO IPOLELA

Go ipolela Kresete go kaya go bolela pepeneneng (go bua ka go rata gonne re eletsa go dira jalo) **go fetoga mo go ikobeleng Satane go ya go Kresete.** *“Ke lo raya kere: Mongwe le mongwe yo o impolelang fa pele ga batho, Morwa-Motho le ene o tlaa mo ipolela fa pele go baengele ba Modimo” – Luka 12:8.*

2. GO IPOLELA KRESETE GO KAYA GO MO IKOBELA KA GOTLHE

Mo go Baroma 10:9, 10 re bona gore “go ipolela Kresete” ke

sengwe se se fetang go bua mafoko a se makae fela ka ga Kresete. Mona go kaya go kgodisega gore kantlha ya tsogo ya ga Gagwe mo baswing Jesu ke Morena. Go kgodisego ka ga Kresete ke go mmaatla go go ka dirang gore motho a tsenye bophelo jwa gagwe gongwe mowa wa mo kotsing.

Mo matsatsing a ga Paulo baheitane ba ba ne ba obamela ba ne bare, "Kaesare ke Kgosi". Mongwe le mongwe yo o ne a gana go bua polelo ena o ne a tshwanetse go swa. Bakresete ba bantsi ba ne ba latlhegelwa ke maphelo a bone kantlha ya go bolela gore "Jesu ke Morena".

God ipolela Kresete ke go mo utlwa ka gotlhe.

3. KOPANO YA RONA LE KRESETE GA SE SEPHIRI

Mo kgolaganong e Ntsha ga gona Kopano ya sephiri ya Bakresete. Buisa Matheo 10:32-33. Mo ditemaneng tsena re bolellwa gore re bolele phatlalatsa go batho botlhe kopano ya rona le Kresete. Gape re tlhokomedisiwa gore fa re sa ipolele Kresete phatlalatsa go batho botlhe, Jesu o tlaa re itatola fa pele ga Rraagwe kwa legodimong.

Go ipolela, ke polelo phatlalatsa ya maitemogelo a se se diregileng mo teng ga motho.

4. BOIPOLELO BO LATELA GO DUMELA

"Ebile ga go ope yo o ka reng: Jesu ke Morena! fa e se ka Moya o o Boitshepo" – 1 Bakorinthe 12:3.

Gore motho a tle a bolele gore Jesu ke Morena motho yo o santlha o tshwanetse go dumela mo go Jesu gore ke Modimo le Mopholosi yo o thata-yotlhe. Gore motho a tle a dumele Moya o o Boitshepo o tshwanetse go kgodisa motho yo o gore Jesu e ne ele Modimo mo nameng *"Se lo tlaa itseng Moya wa Modimo ka sona ke se: Moya mongwe le mongwe o o ipolelang Jesu Kriste yo o tsileng mo nameng ke o tswang mo Modimong. Mme moa mongwe le mongwe o o sa ipoleleng Jesu Kriste yo o tsileng mo nameng, ga o tswa mo Modimo"* – 1 Johane 4:2-3.

Jaaka re setse re kile ra bolela gore boipolelo ke polelo phatlalatsa ya maitemogela a se se diregileng mo teng ga motho le Modimo. Wa bona, ka gonne motho a amogetse Jesu Kresete gore ke wa boamma-ruri mo pelong ya gagwe, o rata go abelana le ba bangwe maitemogelo a se se diregileng mo teng ga gagwe ka mafoko a phatlalatsa. O rata go bolella ba bangwe ka ga Mopholosi wa gagwe o rata go ba supetsa go tswa mo Beibeleng gore ba ka dumela jwang.

5. GO IPOLELA KA MOLOMO WA GAGO

Gona le ditsela tse di ntsi tsa go ipolela Kresete. Re ka ipolela Morena Jesu Kresete ka bophelo jwa rona. Go ipolela ka molomo ke mokgwa o botlhokwa wa go itsise ba bangwe ka ga Kresete.

A re re letsatsi lengwe o tsamaya mo tseleng o tshotse Beibele ya gago. Gongwe o mo tseleng ya go ya gae morago ga Kereke ka sontaga. Ka gonne batho ba go bona o tshwere Beibele, mo tshloganyong tsa bone ba tlaare "Mokresete ke yole". A re re ba go biletsa kwa thoko mme ba go botse dipotso ka ga Jesu Kresete. A re re o tlaa re, "Ke ipolela ka boammaruri gore Jesu ke **Morwa Modimo le Mopholosi wa batho. Ka boitumelo ke ipolela gore ke Morena wame.** Ke tshwanetse go dumela mo go Ena, go mo obamela, le go mo utlwa."

Sena tota ke go ipolela Ena ka bophelo le ka molomo. Sena se bonolo moo ngwana wa Modimo a ka se tshloganyang.

Simololo gompieno go ipolela Jesu Kresete go ba bangwe. Fela fa go siameng thata go ka simolola teng ke mo lapeng la gago. Morago ga moo, bolella ba o dirang le bone ka Ena. Se lapise batho ba ba go reetsang. Rapela gore Modimo a go nee sebaka se se tshwanetseng gore ba o buang le bone ba amogele bosupi jwa gago le go amogela Mopholosi wa gago.

KWALA SENGWE KA THUTO ENA

MORERO WA MODIMO KE WA BOSENANG-BOKHUTLO

Temana ya go e itse ka tlhogo:

“Yo o dumelang mo go Morwa o na le bophelo jo bo sa khutleng; yo o sa utlweng Morwa ga a kake a bone bophelo, mme bogale jwa Modimo bo mo okame” – Johane 3:36.

KETAPELE

Mo dithutong tse tharo tse di latelang re tlaa bona gore bophelo jwa motho bo fetoga jang fa a amogela pholoso. Fa motho a ise a nne Mokresete, a ka akanya gore ke dilo tsa go ithabisa tse di ntsi tse a tshwanetseng go kgaogana le tsone. Etlare fa motho yo o e sena go nna ngwana wa Modimo, a lemoga gore se a se amogetseng go Modimo se se feta ka bokete dilo tsa boleo tse a kileng a ne a di itumella.

Gompieno re tlaa ithuta ka ga selo se segolo go feta tsotlhe se motho a ka se amogelang fa e nna Mokresete. **Bophelo jo bosakhutleng gongwe Bophelo jo bosafeleng.**

DITEMANA TSA GO BUISIWA

Buisa ditemana tsena tse di latelang pele ga gore o simolole thuto ena:

Johane 17:12; Baroma 13:11; 1 Bathessalonika 5:9; Johane 3:16; Bahebera 9:28; Baroma 8:30; 1 Johane 3:2; Baroma 8:35-39; Johane 10:27-29; Bafilipi 1:6; 1 Petoro 1:3-5.

1. NGWANA WA MODIMO KA BOSAKHUTLENG

Fa motho a itemogetse boammaruri jwa bopelo-tlhomogi, ga a kitla a latlhega gape. Fa ele ngwana wa Modimo, ga a kitla a khutla gonna ngwana wa Modimo. O tlaa bolokwa ke bopelo-tlhomogi jwa Modimo go fitlha ka letsatsi la bofelo fa a galalediwa mo legodimong.

Batho ba bangwe ba ruta gore o ka nna ngwana mme e re morago o we mo bopelo-tlhomoging jwa Modimo. Ba dumela gore o ka nna ngwana wa Modimo ka Mosupologo mme wa latlhega ka labobedi.

Gompieno, re tlaa bona gore fa motho e nna ngwana wa Modimo o pholositse go ya bosakhutleng. Re fitlhela kae sesupo sa gore fa motho ele ngwana wa Modimo, ke ngwana wa Modimo ka dinako tsotlhe?

2. SESUPO SE FITLHELWA MO MAIKAELELONG LE MO MORERONG WA MODIMO

Ka go ya ka Biebele, ke maikaelelo a Modimo gore batho botlhe ba ba tlang go Ena ka Kresete gase fela gore ba bone bone pholoso fano mo lefatsheng, fela go tthomamisa ka botlalo gore pholoso ena e felle letsatsi lengwe mo legodimong “*Ee mo go ene (Kresete) yo o re dirilweng ba ona ka ene, rona ba re tthomamisitsweng pele ka fa maikaelelong a ona, o o dirang tsotlhe ka fa kgakololong ya go rata ga ona*” – Baefeso 1:11. “*Mme re itse gore bone ba ba ratang Modimo, dilo tsotlhe di dira mmogo go ba tsalela molemo, ebong bone ba ba biditsweng ka fa boikaelelong jwa Modimo. Gonne ba o ba itsileng pele, o ba tlhaotse-pele, gore ba tshwane le popego ya Morwaa-ona, a tle a nne motsalwa-pele mo baneng ba le bantsi*” – Baroma 8:28, 29.

Pholoso ya rona ga ya ikaega mo leratong la rona go Ena. “*Lorato lo ntse jaana: Ga se rona re ratileng Modimo, mme ke ona o ratileng rona, wa romela Morwaa-ona go nna thuanho ya maleo a rona*” – 1 Johane 4:10.

Lerato lena la Modimo go rona le supiwane ke boammaruri jwa gore re biditswe ke Modimo. Go diragatsa maikaelelo ana, Jesu one a phela a ba a swa. Tsogo ya Gagwe mo baswing e dirile gore Kereke e nne teng. Go rera ka ga Gagwe go fitlhile go ba bangwe. Sena se diregile ka maikaelelo le thato ya Modimo. Kajalo go na le boammaruri ka ga Kresete le ka ga Kereke ya gagwe; go na le boammaruri jwa gore re utlwile Efangele ya Gagwe mme ra se ka ra e gana, seo ke pitso ya rona. Sena ke maikaelelo a Modimo le thato ya Gagwe gore se a se simolotseng mo ngwaneng o mongwe le o mongwe wa Gagwe a se fitlhise bokhutlong jo bo feletseng.

3. SESUPO SE FITLHELWA MO DITSHOLOFETSONG TSA MODIMO

Modimo o solofetsa pholoso e e sa feleng go botlhe ba ba tlang go Ena. Gongwe o botsa potso ena . . . “Go direga eng fa motho a swabisa Modimo, a e santse e le Mokresete?”

A re bueng boammaruri ka ga potso ena. Ga gona ngwana wa Modimo yo o rerang go leofa. Fela go na le dinako tse Mokresete a tleng a leofe. Dafita o re gakolola gore ba ba ikanyang Modimo ba ka

itse gore, le fa ka dinako tse dingwe ba swabisa Modimo, Modimo o tlaa ba thusa. "Le fa a ka wa, (Mokresete) ga a wele ruri gonne **Morena o tshwere seatla sa gagwe**" Pesalome 37:24.

Ka dinako tse dingwe Mokresete wa kgopiwa a we; fela fa ele gore sefatlhego sa gagwe se lebile sefapanong, Modimo ka nonofo ya Gagwe ya lorato o tlaa mo tsholetsa go tsamaya ka nonofo e ntshwa. Ee sena se direga fela ka go tlhabologa le go ipobola.

Jesu o solofetsa gore dinku tsa Gagwe (o kaya Bakresete botlhe) ke tsa Gagwe **ka bosenang-bokhutlo** "*Dinku tsa me di utlwa lentswe la me kea di itse, mme di ntshala morago: Ke di naya bophelo jo bo sa khutleng. Ga di kake tsa latlhega, le fa ele ka motlha ope: le gona ga go ope yo o ka di phomolang mo seatleng same Rre yo o di nneileng o mogolo go botlhe, mme ga go ope yo o ka di phamolang mo seatleng sa ga Rre*" – Johane 10:27-29.

Motho yo o buisang mafoko ana a ga Jesu a ka akanya jang gore motho a ka pholoswa gompieno, mme ya re kamoso a bo a latlhegile? Re leboga Modimo ka Mopholosi yo o makatsang yo o re bolokang go isa bosakhutleng.

4. SE SE BUIWANG KE PAULO

Paulo, ka tsamaiso ya Modimo o bua jaana mo go Bafilipi 1:6 "Ke ikanya gore yo o simolotseng tiro e e molemo mo go lona o tlaa e tswetsa go ya a e fetsa ka letsatsi la ga Kresete.

Ka nako ya go sokologa Modimo o simolotse tiro e e molemo mo mothong: tsholofetso ke gore o tlaa tswetsa tiro e molemo go fitlha Mokresete a ema a feletse ka botlalo fa pele ga Morena.

5. SE SE BUIWANG KE PETORO

Petoro ka go thatafadiwa ke Moya o o Boitshepo, o kwala jaana malebana le bophelo jo bo sa khutleng "*A go bakwe Modimo, Rra Jesu Kriste, Morena wa rona, o o re tsetseng gape ka fa boutlweelong-botlhoko jo bogolo jwa ona, gore re nne le tsholofelo e e tshelang ka go tsoga ga Jesu Kriste mo baswing, re tle re rue boswa jo bo sa nyeleleng, jo bo senang sebala, jo bo sa swabeng, jo lo bo boloketsweng kwa legodimong. Lona ba lo bolokwang ka thata ya Modimo ka tumelo go ya pholosong e e baakantsweng gore e senolwe ka ya bofelo*" – 1 Petoro 1:3-5. Gape o buise Baroma 8:35-39.

6. SE SE BUIWANG KE JESU

Mo go Johane 3:3 Jesu are "*O tshwanetse go tsalwa sesha*" Jesu o tlhalosa gore fela jaaka motho a tsalwa nameng mo lapeng la ga gabo,

fela jalo motho o tshwanetse go tsalwa moyeng gore e nne wa lapa la Modimo.

Mokresete ke motho yo o tsetsweng gabedi. O tsetswe ke moya wa Modimo. O tsetswe go nna wa puso ya Modimo. E nna ngwana wa Modimo ka ntlha ya go tsalwa gabedi. Fa ngwana a tshotswe ele wa ga Rre le Mme bongwana jwa gagwe ga bo kitla bo fela. Gongwe e ka nna ngwana yo o fapogile le yo o kgarakgatshegang fela ke ngwana wa bone. Fa motho ele ngwana wa Modimo tota, bongwana jwa gagwe ga bo kitla bo fela, ke ngwana wa Modimo.

KWALA SENGWE KA THUTO ENA

MORERO WA MODIMO O NAYA BOPHELO JO BOSHWA

Temana ya go e itse ka tlhogo:

“Kea phela, mme ga e tlhole ele nna, ke Kriste yo tshelang mo go nna” – Bagalata 2:20.

KETAPELE

Mo thutong ena re tlaa ithuta ka ga bophelo jo boshwa. Bophelo jo rona Bakresete re nang le bona ke bophelo jo boshwa kantlha ya go tsalwa mo moyeng. Re ithutile jalo mo thutong ya rona ya bofelo. Bophelo jo boshwa jo re nang le jone mo go Kresete bo phelwa ka nonofo e ntshwa. Nonofo ena e tswa kwa go Kresete.

1. BOPHELO JO BOSHWA JWA MOKRESETE BO SIMOLOLA KA LOSO

Fa motho e nna Mokresete o amogela bophelo jo boshwa jo bo tswang go Modimo. Se se gakgamatsang, ke gore bophelo bona bo simolola ka loso. Le fa go le jalo, Mopholosi wa batho o setse a dirafaditse sena. Jesu o **swetse maleo** a rona mo Sefapanong, a **swela rona**. Fa re amogela Jesu Kresete go nna Mopholosi wa rona, gape re amogela se Jesu a re diretseng sone mo Sefapanong. Re amogela boammaruri ja gore Jesu o tsera bonno jwa rona mo Sefapanong, a swela **maleo a rona**.

2. SETSHWANTSHO SA BOPHELO JO BOGOLOGOLO

Pele ga gore motho e nne mokresete, motho yo o o sule mo maleong a gagwe. **Fa pele ga Modimo o athotswe**. Sena ke setshwantso sa bophelo jo bogologolo. **Bophelo bona bo laolwa le go tsamaisiwa ke Satane le bonna**. Buisa mo go Baefeso 2:2.

3. SETSHWANTSHO SA BOPHELO JO BOSHWA

Fa motho a se na go amogela Jesu Kresete jaaka Mopholosi wa gagwe, o **golotswe mo maleong a gagwe a bophelo jo bo fetileng**. O tsetswe gabedi. Ona le bophelo jo **BOSHWA jaanong bophelo ja gagwe bo laolwa ke Modimo**. Buisa Bakolose 3:10.

SEKAI SA GA PAULO

Paulo o bua ka tsela ena . . . Ke bapotswe mmogo le Kriste. *“Ke a tshela, mme ga e tlhole ele nna, ke Kriste yo o tshelang mo go nna, mme se ke se tshelang jaanong mo nameng, ke se tshela ka go dumela mo go Morwa Modimo yo o nthatileng, a ba a ineela losong ka ntlha yame”* – Bagalata 2:20.

Motho o kgona go phela **bophelo jo boshwa** ka gonne Kresete o sule gore a tle a phele. Ke Modimo yo o dirileng gore bophelo jo boshwa bo kgonege, yo o dirang dilo tsotlhe. Modimo o batla gore re nne le **bophelo**, bophelo jwa boammaruri, **bophelo jwa letlotlo** Johane 10:10.

4. NONOFO YA BOPHELO JO BOSHWA

“Mme lo tlaa bona nonofo ya Moya o o Boitshepo, motlhang o tlang mo go lona” – Ditiro 1:8.

Bophelo bona jo boshwa jo MoKresete a bo phelang ga bo laolwe ke thato ya nama. Bo laolwa ke **thato ya Modimo**. Paulo are, “mme ga e tlhole ele nna ke **Kresete yo o tshelang mo go nna**”. Sena ke sephiri sa bophelo jo bo nonofileng jwa Mokresete. **Kresete ke kgosi e e tsogileng mo baswing, O phela mo go botlhe ba ba mo amogelang.**

Fa motho a laetsa Kresete gore a tsena mo bophelong jwa gagwe motho yo o o tlaa tshwana le Kresete. Bophelo jwa ga Kresete bo tsena mo mothong yo o, **bo tsaya boemo** jwa bophelo jwa kgale jo bo bapotsweng le Kresete. Mokresete e nna tokololo ya mmele wa ga Kresete **Mokresete ona le kabelo mo bophelong jwa ga Kresete jwa go tsoga mo baswing**. O ka nna wa re Mokresete ona le karolo mo go Kresete. Sena ke motswedi wa nonofo ya bophelo jo boshwa.

5. TUMELO YA BOPHELO JO BOSHWA

“Se ke se tshelang jaanong mo nameng, ke se tshela ka go dumela mo go Morwa Modimo yo o nthatileng, a ba a ineela losong ka ntlha yame” – Bagalata 2:20.

Paulo are bophelo jo boshwa bo tshwanetse go phelwa **ka tumelo mo go Kresete** ka dinako tsotlhe. Are, lebang nna jaaka sekai. Ke eme fano. Ke tshwana le motho mongwe le mongwe, gonne le nna ke motho fela jaaka ba bangwe. Nyaa lebang gape.

Paulo are ke bophelo jwa ga Kresete mo go ena gape ke bophelo jwa gagwe. Are ena (Paulo) jaanong o phela ka tumelo . . . tumelo mo go Kresete, ke tumelo e e dirang phetogo.

6. TUMELO E DIRA JANG

Mokresete o tshwanetse go leba go Kresete ka dinako tsotlhe. Mokresete o tshwanetse go ikanya Kresete ka dinako tsotlhe a se ka a belaela. O tshwanetse go ikanya Kresete ka dinako tsotlhe. Mokresete o tshwanetse go lebella ka tsholofelo e mafolo-folo letsatsi le a tlaa bonanang le Morena wa gagwe sefatlhego le sefatlhego (motlhang Jesu a a tlaa bonalang gape mo lefatsheng).

Mokresete o tshwanetse go bua jaaka Paulo are “mme ga e tlhole ele nna yo phelang ke Kresete yo o tshelang mo go nna”. Gape ka yone nako eo Mokresete o tshwanetse go gakologelwa jaaka Paulo gore, “Mme se ke se tshelang jaanong ke se tshela ka go dumela mo go Kresete. **Ke kantlha ya gore Mokresete a sa ntse a phela mo nameng moo a tlhokang gore bophelo jwa gagwe bo tsamaisiwe ka tumelo mo go Jesu Kresete.**

7. KOLOBETSO E TSHWANTSHA: BOPHELO JO BOSHWA LE JO BOGOLO-GOLO

Rona botlhe re kile ra bona mongwe a kolobediwa. Re ne re kgobokanye le ditsala tsa rona re rapela. Ke fa moruti a tsena mo bodibeng jwa metsi. Gaufi le Moruti go eme motho yo o amogetseng Kresete jaaka Mopholosi. Motho yo o, gore e tle e nna Mokresete yo o sedimoseditsweng o ne a tsaya dithuto tse di ne di rutiwa ke moruti moo a ne a tlhalosa kgopolo tsa motheo wa tumelo ya Bokresete. Jaanong moruti o tshwara motho yo ka seatla. Santlha moruti o tsenya mmele wa motho yo o otlhe mo metsing. Tiragalo ena e re bolella kgang ya se se setseng se diregile mo bophelong jwa motho yo o. Sena se supa gore bophelo jwa motho yo o, jo bogologolo jwa bolelo bo sule bo epetswe. Sena se dirilwe ke loso lwa ga Jesu Kresete. Jaanong sena ke setshwantsho sa tiragalo e kgolo. Sabobedi moruti o ntsha motho mo metsing. Sena se re bolella ka ga motho yo o a tsamaya **mo bophelong jo boshwa le Kresete.**

Ee loso lwa ga Kresete mo sefapanong le fedisa bophelo jo bogologolo jwa bolelo. Tsogo ya ga Jesu Kresete mo baswing e dirile gore go kgonege gore banna le basadi ba nne le bophelo jo boshwa mo go Kresete.

KWALA SENGWE KA THUTO ENA

THUTO YA LESOME LE BONGWE

MORERO WA MODIMO O NAYA BOPHELO JO BOSHWA (e tswella-pele)

Temana ya go e itse ka tlhogo:

“Ka moo he, fa motho a le mo go Kriste, oa bo a le sebopiwa se seša; dilo tsa bogologolo di fetile, di ntshafetse tsoitlhe!” – 2 Bakorinthe 5:17.

KETAPELE:

Fa motho a pholosiwa ke Morena wa rona Jesu Kresete motho yo o e nna **motho yo moshwa**. Re re ke motho yo moshwa mo go Kresete Jesu. Ka gonne mo go Kresete motho yo o o amogetse **tsalo e ntshwa**. Motho yo moshwa o bona nonofo ka thata ya ga Kresete.

Jaanong re tlaa ithuta ka ga go phela ka tumelo. Ka go rialo ke raya gore motho yo o fetotsweng ka Kresete o phela jang mo lefatsheng le le mo dikaganyeditseng.

Fa re re motho o fetotswe go nna motho yo moshwa ke Kresete, re raya gore motho yo o jaanong o tsamaisiwa ke Moya o o Boitshepo, o tsamaya a dira dilo ka fa Kresete a ka di dirang ka teng. Motho yo moshwa (Mokresete) gape o tlaa ila ditiro tse di bosula le dilo tse di bosula. Dilo tsena tsoitlhe di tlhagisiwa ke go amogela Kresete jaaka Mopholosi.

DIKWALO TSA GO ITHUTA

1 Bakorinthe 10:13; 2 Bakorinthe 5:14-16; Baefeso 4:20-32 le Kgaolo 5.

Fa o ka buisa dikwalo tse di fa godimo ka kelotlhoko o tlaa tlhaloganya sentle se re buang ka sone.

1. NGWANA WA MODIMO KE MOTHO YO MOSHWA

Kantlha ya go tsalwa mo moyeng, motho yo o e nna motho yo **moshwa mo go Kresete** . . . Ka moo he, fa motho a le mo go Kriste, oa bo a le sebopiwa se seša, dilo tsa bogologolo di fetile, bonang di ntshafetse. O ganela Diabolo ka go tladiwa ka boteng ba Modimo.

3. NONOFO YA MOTHO YO MOSHWA MO BOKOENG

Jesu, yo e leng Mopholosi wa motho yo moshwa, ga a pholose motho a bo a mo tlogela. Fa Jesu a pholosa motho kopano eo ke ya bo senang bokhutlo.

Jesu o itse kakanyo ya motho. O itse bokoa jwa motho. Jesu ga a rate gore Mokresete a leofe. Fela Mokresete wa raelwa. Jesu o tlaa mo naya nonofo ya Gagwe go fenyha thaelo ya go leofa.

Nonofo ya ga Jesu e feta dithata tsotlhe tse dingwe.

“Lona ga lo ise lo tshwarwe ke thaelo epe e e ka pallang motho; Mme Modimo o boikanyo o o se kitlang o lo lesa lwa raelwa mo go fetang thata ya lona, mme o tlaa lo direla phatlha mo thaelong, gore lo kgone go e itshokela” – 1 Bakorinthe 10:13.

Re bona mo lefokong la Modimo gore Morwa wa Modimo, Jesu Kresete, o tlaa thusa bana ba Gagwe go latlha maleo le mo dithaelo tsa mefuta yotlhe. *“Gonne moperisiti yo mogolo wa rona ga se yo o pallwang ke go utlwela makoa a rona bothoko, mme re na le yo o neng a raelwa mo mo dilong tsotlhe fela jaaka rona, mme a se ka a leofa. Ka moo he, a re atameleng sedulo sa bogosi sa bopelothomogi ka dipelo tse di phuthologileng gore re tle re amogele kutlwelo-bothoko, re bone boitshwarelo, re tle re thusiwe ka nako ya teng”* – Bahebera 4:15, 16.

4. DILO DINGWE TSE MOKRESETE A DI APOLANG DINGWE TSE A DI APARANG

Buisa gape ditemana tseno tse di latelang: 2 Bakorinthe 5:14-16; Baefeso 4:20-32; Baefeso Kgaolo 5.

Mo ditemaneng tseno tsa dikwalo tse re fetsang go di buisa re bolellwa ka ga dilo tse Mokresete a tshwanetseng go di **apola** le dilo tse a tshwanetseng go di **apara**. Jaanong go tshwanetse ga tlhalogangwa sentle gore motho **ga a apole** dilo tse di sa siamang mo bophelong jwa gagwe **gore e nne Mokresete**. O di apola ka gonne ele Mokresete. Ka gonne motho yo e le Mokresete o a rata, ka thuso ya Modimo go apola tse di bosula mme a apare tse di molemo go galaletsa Modimo.

5. TSELA E MODIMO O RATANG GORE MOKRESETE (MOTHO YO MOSHWA MO GO KRESETE) A PHELE KA YONE

1. **Gopola Modimo . . .** *“Mo gopole mo ditseleng tsotlhe tsa gago, mme ene o tlaa siamisa ditselana tsa gago”* – Diane 3:6.

2. **O nne o itshekile . . .** “*Wena o nne o itshekile*” – 1 Timotheo 5:22.
3. **Itatole boikepo . . .** “*Itatole boikepo le dikeletso tsa lefatshe; mme re phele ka tekano le ka tshiamo le ka borapedi mo lefatsheng leno. Re ntse re lebeletse lesego la tsholofelo le ponatshego ya Kgalalelo ya Modimo o mogolo le ya ga Jesu Kresete Morepholosi*” – Tito 2:12, 13.

KWALA SENGWE KA THUTO ENA

MORERO WA MODIMO O BAKANYA LE GO ROMA BADIRI

Temana ya go e itse ka tlhogo:

“Ke tshwanetse go dira ditiro tsa yo o nthomileng, go sa le motshegare, Bosigo bo etla, jo go seng ope yo o ka kgonang go dira ka jone”
– Johane 9:4.

KETAPELE:

Mo thutong ena ya bofelo re tlaa ithuta mmogo ka ga se se buiwang ke lefoko la Modimo ka Mokresete mongwe le mongwe e le modiredi wa ga Jesu. Fa motho a tla go Jesu Kresete ka tlabologo le tumelo motho yo o a fetoga. Ga go kgonege gore bophelo jwa letlotlo jo o a bo itumellang e nne selo sa sephiri. Gona le sengwe mo mothong yo o se se batlang go fitlha go batho ba ba timetseng.

1. GAPE, GO BOLELLA BA BANGWE GO SUPA GORE RE PHOLOSITWE

Go bolella ba bangwe ka ga Jesu ke sesupo se se ntle sa gore motho yo o o pholositse. Fa ele gore motho o bolella batho ba bangwe ka ga pholoso ya gagwe e gakgamatsang ka Jesu Kresete le gore go tlile jang gore a itse Morena, sena ke sesupo se sentle thata sa gore motho yo o tota o amogetse Jesu.

2. ANDREA O BOLELLA MORWA-RRAGWE

“Mongwe wa ba babedi ba ba ne ba utlwile Johane a bua (ka ga Jesu) ba mo sala morago. (Ba sala Jesu morago) ene ele Andrea morwa-rrago Simone Petoro. Yo a bona Simone morwa-rraagwe pele, a mo raya are: Re bonye Mesia, mo phetolelong ke gore Motlodiwa (Kriste)” – Johane 1:40, 41.

Fano re bona go direga selo se se gakgamatsang thata, Johane Mokolobetsi o ne a rera ka ga go tla ga Jesu Kresete. Andrea o ne a utlwa molaetsa wa ga Johane. Erile morago ga moo ke fa Andrea a kopana le Jesu sefatlhego le sefatlhego mme a mo sala morago. Andrea o ne a itumeletse go bona Morena yo o Johane a ne a bua ka ga gagwe.

Ka gonne Andrea a bone Morena Jesu, o ne a tloga go ya go **bolella ba bangwe**. One a ya go Morwa-rraagwe Simone. Erile a sena go bona morwa-rraagwe, a mo naya molaetsa o itumedisang wa gore “Re bonye Mesia (Kresete).

3. GO NAYA BOSUPI KE SENGWE SE SE FETANG GO BOLELLA BA BANGWE KA JESU FELA

Sena ene e se bokhutlo jwa kgang. Mo temaneng tse latelang re utlwa gore “One a mo tsisa go Jesu”.

Jaanong le **rona** re tshwanetse go dira jaaka Andrea. **Santlha** re tshwanetse go tlhomamisa mo dipelong tsa rona gore re amogetse Jesu Kresete. **Sabobedi** re tshwanetse go ya go **ba bangwe go ba bolella**. Saboraro re tshwanetse go dira se se fetang go bolella ba bangwe fela. Re tshwanetse go tsisa batho ba bangwe go Jesu.

RE KA TSISA BATHO GO KRESETE

Jesu are, “Ka moo he, yaang lo dire merafe yotlhe barutwa, lo ba kolobetse mo leineng la Rara le la Morwa le la Moya o o Boitshepo” – Matheo 28:19.

Jesu ga a kitla a re kopa gore re dire tiro e e sa kgonegeng go ka direga ka dinako tsotlhe o naya badiri nonofo le kaelo ya Gagwe. A re lebelle ditsela dingwe tse Mokresete mongwe le mongwe a ka di dirisang go tsisa ba bangwe kwa go Kresete.

1. Re ka bontsha ba bangwe lerato la Modimo go rona.
2. Re ka buisetsa ba bangwe lefoko la Modimo le go ba tlhalosetsa lone.
3. Re ka rapella ba bangwe.
4. Re ka etela batho ba bangwe le go ba rapella.
5. Re ka phela bophelo jwa Bokresete jo eleng sekai go ba bangwe.
6. Re ka laetsa batho ba bangwe go tla Kerekeng ya rona go utlwa Efangele e rerwa.

Ditsela tsena tsotlhe tsa go tsisa ba bangwe kwa go Kresete Modimo o tlaa di tshegofatsa.

Banna le basadi botlhe ba ba tlhoafetseng, ba ba dumelang mo go Kresete, ba ba ratang batho ba bangwe ka lorato lwa boammaruri, ba ka fitihella ga bonolo botlhale jo bo tlhokegang go nna batswari ba batho ba ba atlegileng. O se ka ware tiro ena ke ya bareri le badikone ba kereke fela **Tiro ena ke ya Mokresete mongwe le mongwe.**

5. DILO TSE THATARO TSE DI TLHOKIWANG KE MOTSHWARI WA BATHO

Jaaka mo ditirong tsotlhe tse di bothokwa, motswari wa batho o tshwanetse a ipaakanya.

Fano ke dingwe tse eleng motheo wa tse di batlegang gore motho e nne motshwari wa batho yo o siameng.

1. **Lerato la boammaruri la go rata batho ba bangwe.** Motho yo o ratang go nna motshwari wa batho o tshwanetse go nna le lorato lwa boammaruri go batho botlhe, **batho botlhe**. Ga go kgonege go ka nna motshwari wa batho fa re sena lorato.

Paulo are *“Gonne lorato lwa ga Kresete loa re tlhotlheletsa”*
– 2 Bakorinthe 5:14.

Re ithuta go rata batho ba bangwe ka lorato lo lo boteng lwa ga Kresete. Pele Paulo one a tlhoile merafe ya Baditshaba, fela erile e nna Mokresete Modimo wa mo roma jaaka moapostoli wa bone. Tota ke lorato lo Paulo a ne a rata Modimo ka lone lo lo dirileng gore go kgonege gore a rate batho ba bangwe.

2. **Go ineela ka gotlhe mo tirong.** Tiro ena ga ena go ka diriwa ka pelo e e sa fellang. E batla kgatlhego le lorato. Re a tlhologanya gore gase batho botlhe ba ba neelang nako ya bone yotlhe mo go gapeng mewa ya batho. Bangwe ba batswari ba batho ba ba dirang thata ke batho ba ba neelang ka bontlha-ngwe jwa nako ya bone go gapa mewa ya batho. Nnete ke gore fa o dirisa nako ya go pakela ba bangwe tswella-pele ka tiro ena ka nako tsotlhe. O se ka wa senya nako ya gago.

Jesu o ne a tshwarega ka go bua le mosadi wa Mosamaria a bo a lebala nako ya go ja. One a araba ka gore *“Sejo same ke go dira thato ya go o nthomileng”* – Johane 4:34. Jesu one a dirisa sebaka seo ka botlalo.

3. **Nonofo ya Modimo.** Jesu o solofeditse barutwa gore Moya o o Boitshepo o tlaa ba naya nonofo. O ba laetse gore ba se ka ba tloga mo Jerusalema ba lebelele mo Jerusalema gore ba be ba amogele Moya o o Boitshepo. Ditiro 1:4, 5. Barutwa ba ne ba lebelella ka boitshoko go diragala ga tsholofetso ena. *“Erile letsatsi la Pentekoste le tla, ba bo ba le mmogo botlhe felong go le gongwe. Mme botlhe ba tlala Moya o o Boitshepo”* – Ditiro 2 ditemana 1, 4.

Le rona, fela jaaka barutwa Moya o o Boitshepo a ka nna mo go rona. Jesu o solofeditse gore. *“Ke na le lona ka malatsi otlhe”* – Matheo 28:20.

4. **Kitso ya Dikwalo.** Kitso e lekanyeng ya dikwalo e tlhokega thata go motho yo o eletsang go gapa mewa ya batho. Motho o tshwanetse go itse sentle dikarolo tse di lebaneng le pholoso. Boammaruri jwa Modimo, jaaka re bo neiwa mo Dikwalong, ke lerumo la Moya o o Boitshepo *“Gonne lefoko la Modimo le a tshela, le a dira, le bogale go feta tshaka nngwe le nngwe e e magale mabedi, lea phololela, le be le kgaoganye botshelo le moya, le malokollo le moko, le athole dikakanyo le maikutlo a pelo”* – Bahebera 4:12.
5. **Kakanyo le pelo e e tlhokometseng.** Sebaka sa go pakela ba bangwe se teng ka dinako tsotlhe. Go batlega kakanyo e e tlhokometseng go ka lemoga gore o tshwanetse go simolola jang poledisano le motho yo o, e e malebana le mowa wa gagwe. Batho ba bantsi ba pallwa ke go bua le batho ba bangwe ka ga Kresete ka gonne ba boifa gore ba tlaa dira phoso. Gakologelwa gore go molemo go dira phoso jaanong jaana go na le go nna fela mme wa se ka wa gapela mewa ya batho go Kresete. Ka thuso ya Modimo o ka dira matsapa a go gapela mewa ya batho go Kresete ka bonako o tlaa lemoga gore o na le bokgoni jwa go ka dira tiro eo. Fa o sena go nna le maitemogela o tlaa nna le tsholofelo mo Modimong ka sena ka nosi.

Mogapi wa mewa ya batho o tshwanetse go nna motho yo o botho le yo o pelo-telele. O tshwanetse go ithuta go tsamaisa polelo a e ise kwa polelong e kgolo ya pholoso kwantle ga go tshosa gongwe go galefisa motho yo o. Batho ba bangwe ba tshwanetse go bona lorato le tlhoafalo ya gagwe.

6. **Bokgoni mo go bueng boammaruri.** Se se batlega sa bokgoni mo go bueng boammaruri ke go utlwagatsa sentle boammaruri yo o bo itseng sentle ebile o bo tlhaloganya sentle. Mogapi wa mewa ya batho (Modiredi wa Jesu) o tshwanetse go ka kgona go ka bolela boammaruri jwa pholoso ka Efangele ka tsela e e utlwagalang sentle. O tshwanetse go dirisa dipapiso go tlhalosa dintlha tsa puo ya gagwe. Godimo ga tsotlhe o tshwanetse go nna mo thapelong ka gale go kopa Modimo go mo kaela.

KWALA SENGWE KA THUTO ENA

NNA KE
SOKOLOGILE MO MALEONG AME MME KE DUMETSE
MO GO KRESETE GORE KE MOPHOLOSI WAME. KE MO
AMOGETSE MO PELONG YAME. KE DUMELA GORE KE
ENA FELA MODIMO WA BOAMMARURI. LE GORE KE
ENA YO O NANG LE NONOFO YA GO MPHOLOSA.

SAENA